

# *MITUNA MPE BIYANO*

## *BAEBELE ETENI YA III*

♪ ...kozala lisusu awa na mpokwa oyo, na tabernacle, mpo na kosangana elongo na bondeko kitoko oyo mpe kokumbamela zinga-zinga na Liloba na Nzambe oyo epesameli biso ofele. Mpe tozali...tolingaka kosangana na lipamboli yango.

<sup>554</sup> Mpe nazali bobele kolikia ete Nzambe akopambola biso na mpokwa oyo ndenge Asalaki na ntongo ya lelo, ná liteya ya ntongo. Mpe nazalaki kosolola na mozialani na ngai, Mme Wood, eleki mwa ntango, mpe tozalaki kosolola na ntina na yango, ná M. Wood ná bamosusu. Nakanisi ete oyo wana ezalaki liteya ya malamu koleka ya Ndeko Neville, na mateya kitoko nyonso oyo asilá koteya, Wana ezalaki oyo ya malamu mingi mpo na ngai, koleka nyonso oyo atikálá kotéyá. Nn ntembe te, nasépelaki mpenza mpe nalingaki liteya kitoko wana. Epesaka ngai mpiko, mpe ekataki-kataki ngai. Boye, na—nalingaka kondima solo, boyebi. Boye, mpo na makambo oyo elobi mpiko, boyebi, kozala na mpiko, mpe ndenge... Dawidi azalaki wana, ná lolenge oyo ye... Ntango azalaki na kati ya momekano monene wana, na esika ya koloba: “Ee, nakokende kosala boye, Nkolo, sunga ngai,” azelaki, akendeki kotuna Nkolo soki ásala nini. Akendeki kozua elamba ya efóde, boyebi, mpe alobaki: “Sikawa tótelema mpe tótuna Nzambe: ‘Tosengeli kosala nini na mikakatano oyo?’” Oh, ezalaki mpenza na motuya mingi. Wana ezalaki na vitamine mingi, koleka ba-pharmacies nyonso oyo ezalaki na ekólo. Iyo, misie, esalaka malamu mingi mpenza.

<sup>555</sup> Sikawa, na mpokwa oyo, to—tozali lisusu na likanisi ya koumela koleka minwí te, soki tokokoka, mpo na mituna oyo. Boye tozali—tozali kokota na likambo yango mbala moko. Ezali eteni ya nsuka ya mituna oyo, mpe mbala nyonso oyo nabelemaka mpo na ksilisa yango... Sikawa, Ndeko mwasi Hattie, nalingaki mpenza koloba bongo te, oyebi yango. Na—nazalaki koloba yango kaka boye, bomoni; mpe, malamu. Kasi nazali na mituna mosusu ya kafu-kafu awa kouta na motei moko, mpe ezali mpenza makasi mpo na koyanola na yango. Boyebi, batei oyo, balukaka kokóta-kota na Biblia mobimba mpe komeka kozua eyano na bango moko liboso bátuna yo yango, bomoni. Na bongo... mpe maloba oyo ezali kotiama na bande, ekokende na Georgie epai ya motei moko, moninga na ngai, oyo azali na mituna mwambe awa ya kafukafu, ya Biblia, ezali mpenza mituna ya makasi mpenza.

<sup>556</sup> Sikawa, na mpóso oyo ekoya, bóbósana te, mpe bóbondela mpo na biso.

<sup>557</sup> Mwasi na ngai akomi malamu koleka; asili kotelema sikawa, mpe asungaki na kolamba, lelo. Banninga na biso ya motuya, ya Canada, Ndeko mobali ná Ndeko mwasi Sothmann, bazali awa, bayei kotala biso, mpe na bosolo mpenza, tosepeli mpenza boyei na bango. Mpe mwasi na ngai, lokola ayebaki ete bazalaki koya, ee, asengelaki kotelema mpo ákoka kolekisa mwa ntango malamu ya bondeko elongo ná Baklisto ya motuya oyo. Tozali na esengo ya kozala na Ndeko Freddie elongo ná biso na mpokwa oyo, mpe mwasi na ye atikalaki ná . . . Azalaki awa na ntongo oyo, kasi nabanzi ete atikalaki ná . . . te, ezali malamu, azali elongo ná Meda, mpo ázala elongo ná ye, tóloba, wana biso toyei awa; mpo nayebi ete ekozala mwa ntango molai na mpokwa oyo, tokozala na elambo mpe kosukola makaká. Boye, tozali na esengo ya kozala na bango mpe ná bapaya elongo na biso.

<sup>558</sup> Sikawa, yambo ete tóbanda komeka koyanola na mituna . . . Bóbosana te ete na—nakoki kosala libunga, bomoni, na—nabetaka tóló te ete nalóngaka na makambo nyonso oyo nasálaka. Na—namekaka kozala sembo, kasi ntango mosusu nazali—nazali na libunga. Mpe—mpe soki nazali na libunga, boye bólimbisa ngai; mpe nabondeli ete Nzambe mpe álimbisa ngai, mpo nakáni kosala libunga te. Nazoluka koyanola na yango kaka te mpo— . . . to ndenge ngai . . . mpo na kozua ngambo moko, nayanolaka na yango na boyebi na ngai nyonso mpenza, bomoni. Mpe soki nasengeli kobongola makanisi na ngai likoló na motuna moko ya Biblia, nakanisi yango nde likambo ya kosala mpenza. Tosengeli kobongwana, ata ntango nini, ntango Liloba na Nzambe elobi, mpo ezali Liloba na Nzambe.

<sup>559</sup> Sikawa, nakanisi ete tokobondela lisusu mpo na babeli na mpokwa oyo, lokola momesano. Mbala mosusu omitunaka; ozuaka etonga moke lokola oyo, moke koleka, oh, tabernacle moke oyo, mpe mbala mosusu omónaka te mbano oyo olingaka komona. Kasi likambo ezali ete, na oyo ozali kosala, ozali bobele kobenda bato pene na nkama mibale. Mpe na moko na mayangani ya minene, ntango mosusu okobenda bato nkótó misato kino nkoto zomi, bomoni, mpe—mpe ntango mosusu koleka. Boye lolenge wana nde, okokómá komona mbano na bato mingi. Kasi ná mpokwa oyo, nakozala kaka koyanola . . . Na ntembe te, telephone na biso elelaka nsima na miníti moke nyonso moi mobimba mpe na eteni ya butu.

<sup>560</sup> Oyo afandi awa ezali Mme Reisert, oyo nazotala? Biblia na yo, ndeko mwasi, Ndeko mwasi Wood azali na yango kuna na nsima. Namemelaki yo yango na ntongo ya lelo, kasi na—nazuaki libaku ya kopesa yo yango te. Mpe na—namonaki yo te, na ntongo oyo, Mme Wood moto azali na yango.

<sup>561</sup> Boye, na koyanoláká na telephone, nayebaka ma—makambo

minene oyo esilaki kosalema. Mwasi moko abengaki ngai, alobaki: "Ndeko Branham, nazalaki na liyangani moko *songolo* nazalaki kobele na bokono *moko boye* ntango molai *boye*. Mpe, oyebi, outaki koloba koloba kuna, mpe bobele..." Alobaki: "Nalingaki kokweya sénza ntango Etalisaki bomoi na ngai oyo eleká." Mpe alobaki: "Mpe natikálá kobela lisusu te, kobanda wana."

<sup>562</sup> Mpe mwasi moko ayaki mpe alobaki... Nabanzi azali awa na mpokwa oyo, to asengelaki kokumba motuka longwa Bedford, nabanzi, to esika moko kuna. Mwana na bango ya mobali azalaki awa, nabanzi, azalaki na malali ya motema, azalaki kobéla makasi mpenza. Afandaki awa na liyangani, mpe—mpe Nkolo akótaki na mosala mpe asimbaki... alobaki na mwana mobali yango mpasi na ye, mpe azalaki kokoka mpenza kotómbola lobóko na ye te, asáláki crise cardiaque, mpe loboko na ye mobimba ekangámaki, mpe motema na ye ndenge wana. Mpe mbala moko akotaki na motuka mpe akumbaki yango kino na ndako, atikálá kotungisama lisusu na yango te, kobanda wana. Madame oyo autaki na Bedford akómí? Ozali awa, madame? Ye wana, na nsima. Iyo, auti kobenga ngai, kala mingi te.

<sup>563</sup> Na nsima, mwasi moko abengaki ngai longwa na Evansville. Akokaki kokómá awa te mpo azalaka mosika mingi mpenza, ayebaki te ete tokozala liyangani ya kobondela mpo na babeli na mpokwa oyo. Mpe alobaki: "Ndeko Branham, nafandaki na liyangani ya Evansville," mpe alobaki, "otambwisaki miso na liyangani mpe olobaki... oyebisaki ngai nani ngai nazalaki, ná makambo oyo ngai nasalaki kosala, na bokono oyo nazaláki na yango, mpe bongo na bongo ndenge wana." Alobaki: "Nazalaki kobéla bokono ya asthme, mpe nasengeláki kotumba nkisi ya Asthmador, ná nyonso wana, na chambre, uta ntango nazalaká elenge mwasi." Alobaki: "Esili koleka mibu mibale, mpe natikali kobela yango lisusu ata moke te, kobanda wana." Bomoni?

<sup>564</sup> Kaka mpo na baoyo bazali awa na mpokwa oyo, baoyo bazalaki awa te na ntongo, mpo básepela na litatoli yango; nakendeki na esika batekaka biloko na ntalo moke, kosomba mwana-popi, lobi. Sikawa, ezalaki mpo na ngai moko te, bomoni. Ezalaki mpo na mwana na ngai ya mwasi, Rebeka, oyo kuna. Mpe—mpe Sara alingaki kokende na eloko moko boye, eloko mosusu, lelo. Mwa baninga na ye ya kelasi bazalaki na mwa lisanga moke moko mpo na mwa féti, ya kokundola mbotama to eloko moko, mpe amemelaki ye libonza moko ya moke; mpe ngai nakendeki kosomba mwa mwana-popi moko, ya molai *boye*. Mpe mwasi moko apusanaki wana, alobaki: "Oyebi ngai lisusu?"

<sup>565</sup> Nalobaki: "Nandimi mpenza te."

<sup>566</sup> Mpe eyaki koyebana ete azalaki ndeko moko ya Ndeko Neville awa, oyo pene... ntango nazalaki na nzela na ngai mpo

na kokende na Suede, bango... Ayaki awa, azalaki na mwana moke ya mobali na kiti ya bibosono, kaka lokola Édith moke kuna, mpe mwana yango azalaki na cancer, litutu moko ya mabe na bongó. Mwa motó na ye ezalaki kokita, mpe a... mpe minganga bapesaki ye kaka mpóso misato ya kozala na bomoi. Balongolaki yango mpe balukaki koyeba bokono yango, mpe bamonaki ete ezalaki... oyo yango ezalaki, mpe bapesaki ye kaka mpóso misato ya kozala na bomoi. Mpe basengelaki kotambwisa-tambwisa ye na kiti ya bibosono, na nsima batiaki ye na brancard ntango akendeki na esika ya kotala-tala nzoto na ye, na nsima kozongisa ye na nsé. Nakendeki kobondela mpo na mwana mobali yango, mpe nasengaki na Nkolo ete ábikisa ye. Mpe kaka na mokolo elandaki, ntango bamemaki ye kuna, alobaki: "Naboyi kiti ya bibosono wana."

<sup>567</sup> Akotaki na motuka mpe akendeki kuna, monganga ayaki na brancard ya bapiné, alobaki: "Naboyi brancard yango."

<sup>568</sup> Amataki kuna mpe afandaki, monganga atalaki nzoto na ye, alobaki: "Ee," alobaki, "na esika ya mpóso misato, nakopesa yo mibú monkama na mwambe, oyo okozala na bomoi."

<sup>569</sup> Mpe, lobi eleki, mama yango akutanaki na ngai. Akoki kozala awa, na oyo nayebi, na mpokwa oyo. Mpe mwana mobali yango azalaki kosana lisano ya ndembo, asili kokóma elenge mobali sikawa. Litutu mabe, cancer na bongó, yango etalisaka kaka...

<sup>570</sup> Oh, makambo nkótó na nkótó, bomoni. Nzambe akoki kokweya te. A—Akoki mpenza kokweya te.

<sup>571</sup> Ndeko John, liso na yo ekómi malamu koleka, ndeko? Azuaki likama, azalaki kobeta nsété mpe ebétaki ye na liso. Mpe biso nyonso tozalaki kobón dela mpo na Ndeko John O'Bannon, ndeko na biso ya Louisville, oyo autaki kozua likámá, ná nsété oyo ebetaki ye na liso.

<sup>572</sup> Sikawa, mituna oyo ezali kotalisa bo—bozindo ya motema ya moto moko; ete batángaki yango kati na Makomi mpe bamónaki makambo oyo, kasi bazali te... ntango mosusu bakokisi mposa na bango te, bongo, bayei na yango awa mpo biso tómeka koyanola na yango. Mpe bomoni esika oyo likambo yango etiaka biso; mpamba te, makambo oyo okoloba, bango bakokangama na yango. Boye, osengeli koyeba malamu mpenza ete ozali koloba sóló, mpe naza... na bosóló nyonso oyo okoki kozala na yango. Na bongo, eloko ya kondimisama ete tozali koloba sóló, tósenga na Molimo Mosanto sikawa ete álimbolela biso yango, wana togumbi motó.

<sup>573</sup> Sikawa, Tata na Likoló, oh, ezali mpenza litómba monene ya koloba "Tata" epai na Mokeli monene ya likoló mpe mabele. Mpe tosengi bobele ete Yo Moko Ókamata mituna miye sikawa. Bayei kopesa yango awa ná bozindo nyonso ya bosembo. E Nzambe, tika ete yango éuta na mitema na biso, na bozindo nyonso ya

bosembo, mpo na koyanola na yango na boyebi na biso nyonso; sálá yango.

<sup>574</sup> Mpe tika ete mawa na Yo ézala likoló na moko na moko. Mpe tika ete likambo moko élóbama awa, na mpokwa oyo, likambo oyo ekosunga moto nyonso oyo azali awa. Mpe ntango tokobima, nsima na kobondela mpo na babeli mpe kolia elámbo ná nyonso wana, tika ete tóloba lokola baoyo bautaki na Emaus: “Mitema na biso ezalaki kopela móto kati na biso te wana ezalaki Ye kosolola na biso na nzela?” Mpo tosengi yango na Nkombo na Yesu. Amen.

<sup>575</sup> Sikawa, ndenge nalobaka mbala mingi, bi–biyano oyo ezali—ezali kotalisa mpenza lolenge na ngai ya komona makambo yango, kasi mbala na mbala, elamusaka mwa kowelana. Motuna ya liboso awa, namoni ete ezali likambo oyo nasilaki koloba liboso, mpe ezongeli ngai lisusu. Nalingi te... nalingi kotánga yango sikawa, soki bolingi.

**65. Ntango Adama ná Eva babotaki bana na bango na Edene, bato mosusu bazalaki na mokili na eleko yango? Na Genese mokapo ya 5 mpe molongo ya 16, Kaina afandaki na mokili ya Nóde mpe ayebaki mwasi na ye.**

<sup>576</sup> Sikawa, oyo wana ezali mo—motuna moko malamu mpenza. Sikawa, tolakisami kati na Biblia... Mpe mbala mingi makambo oyo... mbala mosusu tozagaka eyóngi... Nazaláká kotia mwa eteni moko ya lokasa, mpe koloba, “Bótuna. Eyano na motuna nyonso na Biblia.”

<sup>577</sup> Mpe moto moko alobaki: “Ee, mwasi ya Kaina azalaki nani?”

<sup>578</sup> Oh, nazalaki kosala mwa liseki ná yango to likambo ya ndenge wana, nazalaki koloba: “Oh, azalaki mwana mwasi ya mama bokilo na ye,” to eloko moko ya ndenge wana, boyebi, to—to “Azalaki Mme Kaina.” Kasi yango eyanoli na motuna te. Ezali... .

<sup>579</sup> Kuna Kaina azalaki na mwasi, mpo Biblia elobaki ete azalaki an ye. Mpe soki Kaina azalaki na mwasi, asengelaki kozua ye esika moko. Mpe ekozala ndenge moko na motuna oyo:

**Bato mosusu bazalaki na mokili ntango Adama ná Eva babotaki bana na bango na elanga na Edene?**

<sup>580</sup> Sikawa, soki botali malamu, kati na Biblia, balobelaka mbótama ya basi mingi mpenza te. Balobelaka ntango nyonso mbotama ya bana mibali na Biblia, ya basi te. Batikalaka kolobelá mbala mingi te na ntina na mbotama ya mwana mwasi, na kati ya Biblia. To, na bosembo, nayebi te soki nakoki komikanisela eteni moko, na makanisi na ngai, epai batikálá kolobelá mbotama ya mwana moko; epai balobaki: “Babótaki bana mibali ná bana basi.”

<sup>581</sup> Sikawa, Biblia elobelaka bobele bana misato, oyo babotamaki na Adama mpe Eva, mpe ezalaki Kaina, Abele,

ná Seti. Sikawa, soki bango misato wana bazalaki mibali, soki ata mwana mwasi moko te ábótamaka, na bongo, ntango mwasi kaka moko wana (Eva) akufaki, bato balingaki lisusu kozala te, na ntango wana, mpamba te, elingaki kozala na nzela moko te ya—ya kozala lisusu na . . . ete bato bakoka lisusu koyikana, mpo elingaki lisusu kozala na mwasi moko te. Eva alingaki kozala mwasi kaka moko. Kasi, bomoni, balobelaka mbotama ya—ya bana basi te, na Biblia, boye, yango wana basengelaki kozala na bana basi ná bana mibali.

<sup>582</sup> Sikawa, mokomi ya kala, moko na bakomi ya kala koleka, oyo tozalaka na bango, Josephus, alobaka ete bazalaki na bana ntuku nsambo, mpe Adama ná Eva; moko na bakomi ya kala koleka, “bana ntuku nsambo, mpe bazalaki bana mibale ná bana basi.”

<sup>583</sup> Sikawa, soki . . . Na bongo soki Kaina akendeki na mokili ya Nóde . . . Sikawa, soki botali malamu, moto akomi yango azalaki mpenza, mpenza na mayele mingi ntango akomaki yango. Bomonaki ndenge alobaki likambo yango?

**Na Edene, ntango babotaki bana na bango na Edene . . .**  
 Sikawa, na elanga na Edene te, moto oyo akomi yango ayebaki yango. Moto oyo akomaki likambo oyo, alobaki:  
**Ntango Adama ná Eva babotaki bana na bango na Edene . . .**

<sup>584</sup> Na elanga ya Edene te, mpo basilaki kobengana bango na elanga ya Edene. Kasi bazalaki kaka na Edene, mpe elanga ya Edene ezalaki na ésti ya Edene. Kasi Edene ezalaki lokola ekólo to—to nini . . . to etuka, na bongo Nóde ezalaki etuka mosusu to ekólo mosusu pembeni na yango.

<sup>585</sup> Sikawa, moto kaka moko oyo Kaina akokaki kozua, to kobala, asengelaki kozala ndeko na ye moko ya mwasi. Asengelaki kosala yango. Mpamba te, basengelaki kouta kaka na mobali ná mwasi moko, bomoni, mpe asengelaki kobala ndeko na ye moko ya mwasi. Sikawa, elongobanaki na mobeko na mikolo wana.

<sup>586</sup> Mpe Isaka abáláki cousin na ye moko ya makila ya liboso, Rebeka, ebongisamaki na Nzambe. Sárá azalaki ndeko mwasi ya Abraham, ndeko mwasi na ye ya makila; na mama na ye te, kasi na tata na ye. Bomoni, ndeko ya makila, mwasi oyo—oyo Abraham abalaki; na mama ekeseni, kasi na tata moko.

<sup>587</sup> Boye, bomoni, kobalana kati na libota na eleko wana, liboso mo—molongo ya makila ya moto élémbla katikati na bato, elongobanaki na mobeko mpe ezalaki mabe te. Sikawa ezali bongo te. Soki obali ndeko na yo ya mwasi lelo, mpe boboti bana, bakoki kozala . . . ee, bakozala na lolenge malamu te ná nyonso wana. Ata ba-cousin ya makila ya liboso to ya mibale basengeli ata moke te kobalana, bomoni, mpo molongo ya makila ezali kokoba kolemba mpe kobeba.

<sup>588</sup> Kasi likambo kaka moko, oyo Kaina akokaki kosala, ezalaki ete ábalana ná ndeko na ye moko ya mwasi. Mpe kuna nde esika oyo bana yango bazalaki, oyo . . . Azuaki mwasi na ye, akendeki na mokili ya Nóde mpe ayebaki ye, mpe uta na bango, ba—bana babotamaki. Bomoni . . .

<sup>589</sup> Mpe soki botali malamu, na bakitani ya Kaina nde bato ya mayele mingi boeyelaki. Uta na bakitani ya Seti nde basambeli babimelaki, nalingi koloba, mo—mobímbi ya boyengebene. Kuna mpenza, nde baoyo mibale babotaki bakitani mpenza oyo tozali kobika kati na bango lelo.

<sup>590</sup> Sikawa, soki botali malamu lelo (kaka mpo na kosukisa motuna yango): bakitani ya Kaina bazalaka kino lelo, mpe bakitani ya Seti bazalaka kino lelo. Bango nyonso bakóbaki ndenge moko. Bana ya Kaina bazali awa na Jeffersonville na mpokwa oyo, bana ya Seti mpe bazali awa na Jeffersonville na mpokwa oyo. Molongo ya makila ezali kolemba mpe kobebea, kasi bakitani yango bazali kaka kokoba.

<sup>591</sup> Sikawa, bótala malamu. Bana ya Kaina bazalaki ntango nyonso . . . mpe liboso ya kobebisama ya mpela, bango nde bazalaki bato ya mayele mingi: bato ya science, balakisi; mpe basámbeli minene, kasi ezalki etonga ya bakweisami. Bomoni? Sikawa bótala malamu, bazalaki mpenza lokola tata na bango Kaina. Kaina azalaki mosambeli. Atongáki etúmbelo ya kitoko, mpe atongáki losambo moko ya kitoko, mpe amekaki kokómisa yango kitoko mingi, koleka mwa losambo oyo Seti azalaki na yango kuna. Boyebaki yango? Ya solo, a . . . Abongisaki etumbelo yango na ba-fólolo, asalaki yango kitoko, mpe akomisaki yango malamu mpenza; mpe atongaki losambo moko ya monene mpe kitoko mingi, mpo akanisaki ete akokaki kosepelisa Nzambe soki asali bongo.

<sup>592</sup> Mpe Abéle akendeki kozua mwa mwana-mpate, mpe abandaki kobenda yango kino na etumbelo, alalisaki yango likoló na libanga mpe abomaki yango.

<sup>593</sup> Sikawa, soki Nzambe oyo azali moyengebene, soki nyonso oyo Aséngaki ezalaki kosambela, Kaina asambelaki Nzambe na bosembó nyonso mpenza ndenge Abéle asalaki. Bango mibale bazalaki sembo. Bango mibale bazalaki koluka kozua ngolu ná Nzambe. Moko te kati na bango azalaki mozangi kondima. Bango mibale bazalaki mpenza bandimi ya Jehovah. Sikawa, oyo wana epesi biso likambo moko ya kokanisela.

<sup>594</sup> Bato mosusu bazali awa na mpokwa oyo, namóná bango naino te; namóná bino naino te liboso. Kasi bosengeli kosósola likambo oyo, mpe kobomba oyo na makanisi na bino. Bomoni? Ata ozali mosambeli ndenge nini, etali yango ata na likambo moko te. Okoki kofandaka na kati ya ndakonzambe, okoki kozala na bosembó nyonso mpenza, kasi osili kobúnga! Bomoni?

<sup>595</sup> Mpe okoloba: “Ee,” okoloba, “bakengeli na biso bazali na mayele koleka, basila koleká na ba-seminére mpo na kozua mayele oyo eleki. Bazali ba-theologien, bayebi theologie nyonso—nyonso mpe bongo na bongo. Mpe bazali na mayele mingi, batángá, ba...baponami ya malamu koleka oyo toyebi.” Ata bongo, bakoki mpe kobunga! Bomoni?

<sup>596</sup> Sikawa, Kaina, ná bikitani na ye: bazalaki, moko na moko, basambeli minene; bato ya lokumu mpenza; bazalaki bato ya science, ná minganga, na batongi-ndako, ná basali, mpe bato ya mayele mingi. Kasi likitani nyonso wana eboyamaki, kobanda na Kaina kino na nsé.

<sup>597</sup> Na ngámbo ya Abéle: bazalaki batongi-ndako te, to balakisi, to bato ya mayele mingi; bazalaki, tóloba, bato ya komikitisa, lolenge ya babócoli mpate, basali bilanga, oyo bazalaki kotambola na Molimo.

<sup>598</sup> Sikawa, Biblia elobi: “Kokweisama ezali te mpo na baoyo bazali kati na Klisto Yesu, baoyo balandaka makambo na nzoto te, kasi balandaka Molimo.” Moto ya molimo azali na elimi oyo ekoki kokufa ata moke te. Mpe moto ya mosuni azalaka na lolenge ya kosambela zingazinga na ye (mpe alingi kosambela mpe bongo na bongo) kasi azali ya mosuni; azali mozangi kondima te, kasi mondimi ya mosuni; mpe lolenge wana nde eboyamaki.

<sup>599</sup> Sikawa, kobanda wana, Kaina akendeki kobala mwasi na ye na mokili ya Nódé. Sikawa, elobi te nani Seti abalaki, to banani bamosusu babalaki. Mpe eloko na yango ya kitoko mingi, ezali koyeba ete—ete, mpo na líbala ya Kaina, tozali na eyano na yango. Mpo asengelaki kobala ndeko na ye ya mwasi, soki te a... soki te elingaki kozala...

<sup>600</sup> Na mokili, basi mosusu bazalaki te, kasi basengelaki kounta bobele na Eva. Azalaki mama ya bato nyonso ya bomoi. Elingi koloba, bato nyonso oyo bazalaki na bomoi, ye nde azalaki mama na bango. Yango wana azalaki...Liloba oyo *Eva* elingi koloba “mama ya bato na bomoi.” Na bongo, ayaki mpe abotaki mwana yango. Mpe Kaina abalaki ndeko na ye moko ya mwasi, nde nzela bobele moko oyo nakoki komonela yango. Boye, bato bazalaki kobika na eleko wana, ya solo mpenza. Bomoni? Ee, mpe...

**Ntango Adama ná Eva babotaki bana na bango na Edene...**  
Sikawa botala malamu, yango nde motuna: **Ntango babotaki bana na bango na Edene, bato mosusu bazalaki na mokili na ntango yango?** Te! **Bongo na Genese 5:16**, bomoni, Kaina afandaki na mokili ya Node mpe ayebaki mwasi na ye. Na ntembe te. Bomoni?

<sup>601</sup> Eza Genese 1, esika Akelaki moto na elílíngí na Ye Moko, oyo ezalaki na lolenge ya theophanie. Mpe na Genese 2, Asalaki moto uta na putulú ya mabelé, elingi koloba moto ya bomoto oyo tozali na yango sikawa. Na nsima, na mokapo ya 3, moto

akweyaki, mpe babenganaki ye na elanga ya Edene; na nsima, bana yango babotaki bana. Mpe Kaina azuaki mwasi na ye mpe abikaki elongo na ye na mokili ya NÓde, na libanda, mpo Nzambe akabolaki ye na bondeko ná ndeko na ye moko (mpo na liwa ya—ya Abele). Mpe ye nde oyo ye azuaki, ndeko na ye moko ya mwasi, mpe abalaki ye; yango nde nzela bobele moko oyo nakoki, ngai moko, nakoki komona lolenge oyo—oyo ye abalaki.

<sup>602</sup> Sikawa, elobamaki... Mpe nazolikia ete baninga na ngai ya moindo oyo bazali awa bakolimbisa elobelí oyo, mpo ezali solo ata moke te. Mbala ya liboso oyo nakutanaki na moto moko na bomoi na ngai, nsima na ngai kobongola motema... Nazalaki... nakutanaki na Ndeko George DeArk ná bamosusu kuna. Nazalaki kotambola, mpe Nkolo akambaháki ngai na mwa esika moko. Mpe bazalaki kowelana, soki moto moindo aútá wapi. Bazalaki koluka koloba ete moto moindo, ete Kaina abalaki nyama oyo azalaki lokola makáku, mpe na nzela yango nde moto moindo ayaki. Sikawa, wana ezali lokuta! Na ntembe te, wana ezali lokuta! Mpe bón dima likambo yango ata moke te. Mpamba te, ezalaki na moto moindo to mondele moko te, to moto moko ya loposo mosusu, ezalaki bobele bato ya loposo kaka moko liboso na mpela. Bongo, nsima na mpela mpe linóngi ya Babéle, ntango babandaki kopalandanga, na ntango wana nde bazuaki ba-lángi ya loposo na bango mpe bongo na bongo. Bango nyonso bautaki na nzete yango moko. Ezali mpenza bongo. Adáma ná Eva bazalaki tata mpe mama, na mokili, ya bikelamo nyonso ya bomoi ya bato, oyo batikálá kozala na mokili. Ezali solo. Moindo, mondele, mwa moindo, mosáká, ata ozali lángi nini, etalaka mpenza esika oyo ofandaka, mpe lolenge oyo—oyo ba... Kaka lokola...

<sup>603</sup> Nakanisi ete nakoki koloba yango polele, wana nazali kolobelá yango. Bato awa sikawa, ná bokabwani ya lángi ya loposo oyo, ná mibeko mpe makambo oyo bazali koleka na yango, nakanisi ete ezali likambo ya nsoni. Ya solo mpenza. Bóyoka, bótika bato yango kimia, bayebi eloko nini balangi. Nzambe asalaki ete moto moko ázala moindo, mpe asepelaka na yango. Ya solo mpenza! Soki Nzambe ásalaka ngai moto moindo, nalingaki kosepela na yango; soki Ásalaka ngai mwa moindo, nalingaki kosepela; soki Ásalaka ngai mondele, nasepeli; soki Ásalaka ngai na lángi ya mosaka, nalingaki kosepela. Nzambe nde asalaki biso na ba-lángi na biso, mpe Asalaki biso ndenje Alingaki biso tózala, mpe biso nyonso tozali bana na Ye. Ya solo mpenza! Mpe basengéláki te koswana mpe kosala makambo ya ndenje wana. Ezali mabe kosala bongo. Basengelaki kosala bongo te. Nzambe asálaki biso... ndenje tolingaka yango.

<sup>604</sup> Mpe moto moindo aboyaka kosala likambo oyo ekoki kobevisa molongo na—na ye te, to lángi na ye, mpe kosangisa yango ná mondele mpe makambo nyonso ya ndenje wana. Nazopamela ye te. Nazosala yango te. Moto moindo azali na

makambo oyo mondele azali kutu na yango te. Ya solo mpenza! Ezali mpenza ya solo. Mpe Nzambe akáná ata moke te ete bango bázala bongo.

<sup>605</sup> Ee, bótala. Moto moindo azali...azali—azali...azali na—azali na lolenge na ye moko oyo mondele azali na yango ata moke te. Amitungisaka te, “atielaka Nzambe motema, mpe atikaka makambo emitambolela na yango”; ázala na yango to ázanga, azalaka kaka na esengo. Nakosepela mingi mpenza kozala kozala na eloko wana, na mpokwa oyo, ya solo mpenza. Ee, azali na yango, mpe wana ezali libula na ye; baboyaka kosangisa yango ná mabota ya loposo mosusu, mpo na kobebisa yango. Ezali mpenza ya solo.

<sup>606</sup> Nakanisi ete mwasi wana, kuna na Shreveport, alobaki moko na makambo ya malamu koleka—ya malamu koleka oyo natíkálá koyóká na bomoi na ngai. Alobaki likambo moko, mpe bakomaki yango na zulunale. Apusanaki, alobaki: “Ndenge makambo oyo ezali kosalema awa, ná bokabwani oyo, nalingi te bana na ngai bákende na eteyelo ya mindele wana.” Alobaki: “Bakosungama mpenza te ndenge balingaki kosungama, soki bazalaki na molakisi ya moindo.” Mwasi yango azali mwasi ya mayele. Ayebaki eloko oyo azalaki koloba, bayékolaka malamu koleka. Ezali mpenza solo. Boye, nakanisi bato bazali kosala libunga, ntango bazósála bongo.

<sup>607</sup> Lisisu, balobaka: “Kaina ná Abele...” mpe bongo na bongo ndenge wana. Te, misie! Mposo moindo ezalaki na likambo moko te ya kosala ná yango. Ezali molimo oyo ezali na katí nde ezali na likambo ya kosala ná yango. Ezali mpenza solo.

<sup>608</sup> Boye, Kaina ayebaki mwasi na ye, mpe wana azalaki ndeko na ye ya mwasi. Mpe bango... amemaki ye na mokili ya Nóde, mpe kobanda wana bikolo minene ya mokili ebimaki: bato ya eyamba ná basámbeli.

<sup>609</sup> Mpe kanisa naino lelo, moninga, téléma mpe kanisa naino mwa moke. Bato nkoto ntuku na ntuku mbala nkoto ntuku na ntuku mpe nkoto na nkoto, bakendeke mpenza na bałosambo, bazalaka na bosembó mpe babúlisami na lingombá yango na ndenge nyonso bakoki, mpe basili kobúngá mpenza ndenge Kaina azalaki. Bomoni? Ezali Nzambe Moto aponaka! Ezali Nzambe Moto aponaka! Bomoni? Nzambe Moto ayokelaka mawa! Lima ekoki koloba na mosali mbeki te, ezali nde mosali-mbeki ná bokonzi likoló na lima. Ya solo.

<sup>610</sup> Sikawa, motuna moko ya kitoko yango oyo, oyo elandi awa:

### **Na Petelo ya Mibale 2:4—2:4...**

<sup>611</sup> Moto oyo azali na Biblia, oyo alingi kofungola Makomi oyo noki-noki, wana nazali kotánga Yango, soki bolingi, mpe kosunga ngai mwa moke awa, wana tozali koyanola na motuna oyo.

- <sup>612</sup> Sikawa, na oyo etali Kaina oyo mpe—mpe nyonso wana, soki yango eyanolí na motuna yango te, yebisa biso. Tokosepela . . .
- <sup>613</sup> Sikawa Petelo ya Mibale 2:4. Malamu, misie, yango oyo:
- 66. Petelo ya Mibale 2:4: “Mpo soki Nzambe . . . Mpo soki Nzambe atikaki banje te oyo basumukaki, kasi abwakaki bango na lifelo,” na bongo, mpo na nini Klisto ateyaki milimo oyo ezalaki na boloko, na Petelo ya Liboso 3:19?**
- <sup>614</sup> Sikawa, tozui liboso Petelo 2:4. Malamu:
- Mpo soki Nzambe atikaki banje te oyo basumukaki, kasi abwakaki bango na—na lifelo, mpe—mpe akangaki bango na minyololo ya molili tuu, ete babátelama mpo na kosambisama;*
- <sup>615</sup> Sikawa, sikawa tótala na Petelo ya Liboso (wana ezalaki Petelo ya Mibale), Petelo ya Liboso 3:19, bóyoka likambo oyo. Yango oyo, awa mpenza. Mituna oyo euti kokómá, nde ntina oyo nakomáki yango te.
- ... yango mpe . . . akendeki koteya milimo kati na boloko;*
- <sup>616</sup> Oh, iyo, yango oyo. Tóbanda mwa moke liboso na yango, molongo ya 18:
- Mpamba te Klisto mpe . . . anyokwamaki mpo na masumu mbala moko mpo na libela, ye moyengebene mpo na bato mabe, ete ákoka komema biso epai na Nzambe, abomamáki kati na nzoto, kasi ajalisamaki na bomoi na Molimo:*
- Na nzela na yango mpe Akendeki koteya milimo kati na boloko;*
- Oyo bazangaki kondima, . . .*
- <sup>617</sup> Moninga na ngai molingami, soki otángi molongo oyo elandi, kuna nde Elimbolaki Yango. Bomoní?
- Oyo kalakala bato bazángáki kondima, oyo ntango motema molai ya Nzambe ezalaki kozela na mikolo ya Noa, wana masuwa ezalaki koléngelama, na kati na yango bato moke, elingi koloba, milimo mwambe ebikisamaki na mai. (Bomoní?)*
- <sup>618</sup> Sikawa, soki botali malamu awa, nabanzi motei yango azali na motuna mosusí na ntina na . . . eloko moko ya lolenge moko wana, ekoyanolama mwa moke na nsima.
- <sup>619</sup> Petelo ya Liboso 4 . . . to 2:4, soki botali malamu, “mpo soki Nzambe atikaki banje te,” *mwanje* yango ekomámi ndengete nini? Ná “m” ya moke. Bomoní? Sikawa, esika oyo, “milimo oyo ezalaki na boloko, oyo ebongolaki mitema te, na ntango ya motema molai na mikolo ya Nowa,” banje yango moko. Ezalaki bato: batindami, batei; “atikaki banje te.” Boyebaki ete . . . liloba oyo *mwanje* euti na liloba oyo “motindami”? Bato boni bayebi

ete *mwanje* azali “motindami”? Ya solo mpenza, *mwanje* azali motindami, “mpe Atikaki banje te.” Bomoni?

<sup>620</sup> Mpe awa na Baebele, bozali koyeba lisusu ete toyekolaki yango eleki mwa ba-mpóso, “banje”?

<sup>621</sup> Mpe kuna na Bae-...na Emoniseli: “Komela *mwanje* ya lingomba ya Saláde makambo oyo. Komela *mwanje* na lingomba ya Efese makambo oyo. Komela *mwanje* na lingomba...” Boyebi yango lisusu? Mpe tolukaki liloba yango *mwanje* na dictionnaire, mpe tomonaki ete elingi koloba “motindami”. Ekoki kozala “motindami na mokili, motindami ya molimo,” liloba oyo *mwanje*.

<sup>622</sup> Boye, na lolenge wana, soki tozui lexique mpe toluki-luki yango, bokomona ete ebandi na “batindami, batindami ya liboso.” Bomoni: “Soki...Soki Atikaki te...Mpamba te, soki Nzambe atikaki banje te oyo basumukaki,” (Bomoni?) “mpe bizàli ya molimo,” (Bomoni?) “nsima na kozela...”

Sikawa bótala malamu, alobaki:

...soki...atikaki banje te oyo basumukaki, kasi abwakaki bango na lifelo, mpe akangáki bango na minyololo ya molili tuu, ete bábatelama mpo na kosambisama;

<sup>623</sup> Na bongo, bótala lisusu na Petelo ya Liboso awa, 3:19, bótala ndenge ekomami sikawa:

Mpamba te, na yango mpe akendeki koteya na milimo katí na boloko;

Oyo kalakala ezángaki kondima, ntango motema molai ya Nzambe ezalaki kozela na mikolo ya Noa,... (bomoni, ezalaki batindami ya mokolo wana, batindami)...ntango masuwa ezalaki kolengelama, oyo...elingi koloba, milimo mwambe babikaki na mai.

<sup>624</sup> Sikawa soki botali malamu ntango bizàli yango bazalaki na Lola. Sikawa, na Emoniseli 11... to mokapo ya 7, nakanisi... to te, te, ezali mokapo ya 12. Apesi elili moko ya mwasi oyo atelemi; sánzá na motó na ye mpe moi...to, moi na motó na ye mpe sánzá na nsé ya makolo na ye. Mpe dalagóna motane atelemaki mpo na kolia Mwana yango ntango kaka Abotamaki, mpe akamatáki mokila na ye, abéndaki ndambo na misato ya minzoto ya Likoló, mpe abwakaki yango na mabelé. Bomonaki yango? Sikawa, elingi koloba te ete Satana azali na—na mokila molai oyo akangelaki yango bato, kasi “lisapo oyo abetaki,” mpe abendaki ndambo na misato ya minzoto yango. Minzoto yango ezalaki momboto ya Abraham.

<sup>625</sup> Abraham alobaki: “Oh...”

<sup>626</sup> Nzambe ayebisaki Abraham: “Tala na likoló, mpe tánga minzoto soki okokoka.”

<sup>627</sup> Alobaki: “Nakokoka kosala yango te.”

<sup>628</sup> Alobaki: “Okokoka mpe kotánga momboto na yo te,” minzoto.

<sup>629</sup> Monzoto Mokongengaka na Ntongo, ezali Nani? Yesu ya Nazarete, oyo aleki kongenga nyonso oyo ebiká na nzoto ya moto. Azali Monzoto Mokongengaka na Ntongo. Mpe Azali Momboto ya Abraham, oyo ayei na nzela na Isaka. Mpe biso, lokola tokúfi kati na Klisto, tokómi Momboto ya Abraham mpe tozali basangoli ya libula kokokana na elaka.

<sup>630</sup> Boye, minzoto ya likoló ezalaki kotalisa milimo ya bato awa. Mpe ntango dalagóna motane (Roma, na ntango ya minyoko na yango) abotolaki ndambo mibale na misato ya... to ndambo na misato ya minzoto, mpe abwakaki yango na nsé, esalemaki ntango babákáki Nkolo na biso Yesu na ekulusu, ntango baboyaki Ye mpe Akómaki... mpe babwakaki Ye mpe bazalaki na ntina na Ye te; yango nde ndambo na misato ya minzoto ya banje, bizali ya banje.

<sup>631</sup> Bomoní, kati na nzoto na yo, na kati na yo... (tozali na motuna mosusu na ntina na yango, mbala moko, mpo na koyanola na yango malamu koleka). Boye, ntango... Na kati na yo ezali molimo, moto mosusu. Libanda na yo ezali moto moko, kati na yo ezali moto mosusu. Boye, na kati na yo ezali likambo ya molimo, libanda na yo ezali nzoto oyo. Bomoní? Mpe ezáli oyo, soki okambami na Molimo, na Nzambe, okomi motindami ya Nzambe, to mwanje. *Motindami* ya Nzambe, *mwanje* ya Nzambe, ezali kaka liloba moko yango; okoki kokabola yango te: Motindami ya Nzambe, to, mwanje ya Nzambe.

<sup>632</sup> Bongo, nani azali na bokonzi ya koleka? Mwanje ya Likoló to mwanje na eteyelo? Nani azali na yango? Mwanje na eteyelo! Polo alobaki: “Soki Mwanje moko ya Likoló ayei koteya bino nsango-malamu mosusu libanda na oyo ngai nasili koteya, tika ete álakelama mabe.” Boye, mwanje oyo apakolami na Molimo Mosanto mpe ná Liloba azalaka pembeni na Nzambe. Ya solo. Na Likoló, bokonzi na ye... .

<sup>633</sup> “Ba-nguya nyonso na Likoló mpe na mokili epesami na loboko na Ngai. Bókende, mpe Nakokende elongo ná bino. Nyonso oyo bokokanga na mokili, Nakokanga yango na Likoló. Oyo bokokangola na mokili, Nakokangola yango na Likoló.”

<sup>634</sup> Oh, soki Lingomba monene ya bulee ekoki bobele kosósola nguya na yango ya kosala makambo oyo! Kasi ntembe, kobanga, mpe kolenga eleki mingi mpenza, komituntuna soki ekosalema, “Ekoki kosalema?” Na ntango nyonso oyo likambo wana ezali, Lingomba ekoki kotelema ngwi ata moke te. Mpe ntango maloba nyonso ya kobanga elímwé mpe Molimo Mosanto azui bokonzi mobimba ya Lingomba, na ntango wana kobanga nyonso esili, mpe Lingomba yango ezali na nguya. Bomoní? Ee, bazali na nyonso oyo Lola ezali na yango nsima na bango. Bazali bantóma

ya Ngwende. Ya solo mpenza! Ntóma ya Klisto azali na bokonzi, mpe nyonso oyo Klisto azali na yango ezali ya ntóma yango. Mpe Alobaki: "Bókende na mokili mobimba, bozali batátoli na Ngai nsima na Molimo Mosanto kokita likoló na bino." Mpe motatoli azali nani? Azali ntoma; asengeli koya kotatola likambo moko. Ba-nguya nyonso ya Likoló ezali mpenza na maboko na yo! Oh, mpo na nini tofandi swí? Mpe lingomba ezali ekomba, mpe tozali kolala mpongi. Ezali mpo tozali koyeba mpenza makambo oyo te.

<sup>635</sup> Sikawa, milimo oyo ezalaki na boloko (oyo ebongolaki mitema te), ezalaki bizali ya Banje te, oyo basiláká—basiláká kokita na lolenge ya Banje, kasi ezalaki milimo ya bizali ya banje yango, oyo bakweyaki liboso na kozalisama ya mokili, kalakala, ntango etumba engidaki na Likoló. Mpe Satana ná—ná dalagóna babundáki, na nsima...to Mikaele ná—ná—ná dalagona babundáki (ná Lusifele). Mpe Lusifele abwakamaki, elongo ná bana na ye nyonso (banje nyonso oyo ye asilaki kopengwisa), mpe banje yango bayaki na mokili mpe bakokaki kokómá bato. Mpe ntango basalaki yango, ezali na ntango wana nde "bana mibali ya Nzambe bamonaki ete bana basi ya bato bazalaki kitoko, mpe bazuaki bango lokola basi."

<sup>636</sup> Bazali bana mibali ya Nzambe. Moto nyonso oyo abotami na mokili oyo azali mwana na Nzambe. Ata azali mosumuki to nini, azali mwana na Nzambe. Akelámaki na elilingi ya Nzambe, mpo na masanzoli ya Nzambe, akelámí ndenge wana. Kasi Nzambe, na ebandeli, ayebaki nani akoyamba Ye mpe nani akoyamba Ye te. Na yango Akokaki kobongisa liboso, to, kobongisa liboso te, kasi na boyebi makambo liboso, Akokaki koyeba nani akobikisama mpe nani akobikisama te, mpo Ayebaki moto nani akozua molimo nini.

<sup>637</sup> Mpe milimo yango eutaki na Ngwende ya Nzambe, mpe ezali liboso na Ngwende ya Nzambe, mpe oyo ebikaki...mpe mibu nkiasi na nkiasi ya ntango oyo ekoki kotángama te, liboso mpenza mokili ébanda, na Bozali ya Nzambe, bokanisi ete bazángi koyeba likambo oyo etali kosambela? Bakitaka mpe bakotaka kati na bato, mpe bakúmbamelaka Nzambe! Na ntembe te, basámbelaka Nzambe; mpe bazali na boyebi ya Nzambe, mpe bazali na mayele, mayele mingi, mpe batángá, ntango nyonso. Kasi Nzambe aboyaki bango uta ebandeli!

<sup>638</sup> Boye, yango wana, moninga, kimondimi ya lingomba, to—to boyebi ya likindo moko to eloko moko, etalaka Yango ata moke te. Esengeli kozala Makila na Yesu Klisto mpe mbotama ya sika oyo ekosangisa yo ná Ye lokola moto moko. Yango mpenza.

<sup>639</sup> Nzambe, na ebandeli, ntango Ayebaki ete...Mobali ná mwasi basálemaki moko, mibale te, basálemaki moko. Bakabolamáki, moko atiamaki na nzoto mpe mosusu na theophanie. Ayebaki yango. Boye mpo na kotalisa bino yango polele: ntango Nzambe asalaki mwasi, Azuaki ata moke te

putulú mpo na kosala ye ndenge Asalaki mobali; Alongolaki mokúwa moko na mopanzi ya Adama, mpe akómaki eloko oyo euti na mobali (mpo azali eteni ya mobali). Bosósoli Yango sikawa? Bomoni? Yango mpenza.

<sup>640</sup> Banje bango wana. Mpe Nzambe ná molimo oyo esangani ná Nzambe ezali Molimo moko. Ya solo. Sikawa, Molimo ya Nzambe oyo efandi kati na Lingomba, ezali Molimo oyo euti na Likoló, oyo Nzambe ayebaki liboso na kozalisama ya mokili, oyo eboyaki lokuta ya zabolo. Ete molimo yango esengelaki kozua nzoto ya mosuni mpo na kozala... kozua mimekano na ye. Asengelaki kolátá nzoto lokola bamosusu oyo, mpe bango nyonso bamemaki mokumba ndenge moko. Mpe Nzambe, na ebandeli, ayebi milimo oyo ekondima, ná oyo ekondima te. Yango mpenza. Zabolo yango azali na mayele mingi na lolenge ete akoki kopengwisa ata baponami, soko nde ekokoka.

<sup>641</sup> Boye, milimo oyo, banje oyo bateyaki, bazalaki na boloko; *banje*, soki botali yango malamu awa, ekomami na “m” ya moke, elingi koloba “moto”; banje, batindami awa na mokili. Basumukaki, mpe nzela bobele moko oyo bakokaki kosala lisumu ezali koboya kondima! Mpe lolenge oyo... Bazalaki na biyamba na bango moko, mpe bandimaki nsango ya Noa te. Bandimaki nsango ya Enoka te. Mpe baboyaki Nsango na bango, “mpe bakweisamaki,” Biblia nde elobaki ete bazalaki bongo.

<sup>642</sup> Enoka asakolaki epai na bango, alobaki: “Nkolo akoyá ná nkoto zómi ya basantu na Ye.”

<sup>643</sup> Mpe basakolaki. Mpe Noa atongaki masuwa, kasi balobaki: “Azali motúntuki! Azali fanatiki! Eloko lokola mbula ezalaka te.” Mpe mibu monkama na ntuku mibale elekaki, mpe azalaki na eyamba oyo ezalaki na lobiko kati na yango, ekimelo moko esilaki kosalema, kasi bazalaki kosepela lolenge oyo bazalaki kati na yango.

<sup>644</sup> Ezali mpe bongo lelo, bato bazali kosepela na lolenge oyo bazali kati na yango. Kasi ekimelo moko ezali, mpe ekimelo yango ezali kati na Yesu Klisto. Amen. Yango mpenza: libota yango moko, milimo yango moko.

<sup>645</sup> Bazalaki mpenza basambeli, basambeli minene, kasi bayambaki ndayi ya boyokani te.

<sup>646</sup> Ezali mpe bongo lelo. Bato bazali kosambela, kokota na mangomba ya minene, mpe koluka kozala moto oyo ayebani koleka na engumba. Soki balingi kokota na lingomba, baponaka oyo eleki monene na engumba, ya malamu koleka mpe ya lokumu koleka na engumba. Ndenge bakei mpenza mosika na kobéngama! Ndenge bakei mpenza mosika na Yango!

<sup>647</sup> Nzela bobele moko okotikáláká koyeba Yesu Klisto, ezali na emoniseli ya molimo, na likindo te, mpe boni boni oyekolaka Biblia te. Ózala moto ya Science Chrétienne, Metodiste, Témoin de Jéhovah, to nyonso oyo ozali; ózala nani, okoyeba Yango ata

moke te na nzela ya Liloba, Molimo ya Nzambe nde emonisaka Ye epai na yo. Ezali emoniseli ya molimo!

<sup>648</sup> Ntango Adama, na elanga ya Edene, ná Eva, ntango babenganaki bana yango, Kaina ayaki ná likindo moko ya malamu. Alobaki: “Nzambe asengeli koyeba ete tozali kosala yango na motema na—na ngai mobimba. Nakotonga etumbelo moko ya kitoko, nakotia ba-fololo likoló na yango, nakotia bambuma likoló na yango, nakokomisa yango kitoko. Na ntembe te, nakoki kokitisa motema ya Nzambe ná oyo, mpe kotalisa Ye ete nazali sembo na motema na ngai.” Alóngaki, na oyo etalaki Liloba; Nzambe azalaki na mposa ya kokumbamela, akendeki kosambela. Abongisaki esika moko ya kitoko mpo na kosambela, cathédrale ya kitoko, ya monene (ndenge babengaka yango lelo). Mpe asalaki yango malamu, atongaki yango malamu mpe atiaki etumbelo kati na yango; azalaki mozangi kondima te.

<sup>649</sup> Kasi Abele, kokokana na Liloba na Nzambe... Biblia ekomamaki naino te, na eleko wana, kasi Nzambe *amonisaki* ye ete ezalaki mbuma te nde ebimisaki biso na elanga na Edene, ete Adama ná Eva baliaki ba-póme te, ete ezalaki mpenza makambo ya koyebana nzoto nde ekabolaki bango mpe epanzaki bango. Mpe lokola bayebaki ete bakómaki bato oyo bakokuфа, na nzela na makila ya Adama, mpe na nzela na makila ya nyoka oyo abandaki likambo yango, Abele, na emoniseli ya Bonzambe, akendeki, azuaki mwana-mpate mpe akabaki yango mbeka. Mpe Nzambe alobaki: “Ezali Yango!” Ya solo.

<sup>650</sup> Ntango bautaki na Ngomba ya Mbongwana, Yesu alobaki: “Bato balobaka ete Ngai Mwana na moto Nazali nani?”

<sup>651</sup> “Bamoko balobaka Ozali ‘Mose,’ mpe bamosusu balobaka Ozali ‘Eliya,’ bamosusu balobaka Ozali ‘Yilimia,’ mpe bamosusu balobaka Ozali ‘Mosakoli yango.’”

<sup>652</sup> Alobaki: “Kasi bino bolobaka ete Ngai Nazali Nani?”

<sup>653</sup> Petelo alobaki: “Ozali Klisto, Mwana na Nzambe ya Bomoi.”

<sup>654</sup> Alobaki: “Esengo na yo, Simona mwana ya Jona, mpo mosuni mpe makila emonisi yo yango te.” (Botala malamu!) “Ezali mpe na nzela na mokanda te, ezali mpe na nzela na kelasi te; oyekoli yango na likindo te, moto moko mpe ayebisaki yo yango te. Mosuni mpe makila emonisi yo yango te, kasi Tata na Ngai oyo azali na Likoló nde amonisi yo yango. Mpe likoló na libanga yango Nakotonga Lingomba na Ngai, mpe bikuke ya ewelo ekoki kolónga Yango te.” Yango mpenza. Yango nde Lingomba na Nzambe ya bomoi. Yango mpenza. Likoló na lingomba yango... Likoló na *emoniseli* yango nde Lingomba oyo etongami. Ezali emoniseli ya Bonzambe oyo Nzambe asili komonisa, ete Yesu Klisto azali Mwana na Nzambe, mpe osili koyamba Ye lokola Mobikisi na yo moko, olongwe na kufa mpe koingela na Bomoi.

<sup>655</sup> Mpe Molimo Mosanto azali kosala mosala kati na binama ya Nzoto yango. Yango nde Lingomba! Ata ezali na bobólá, mpe na mission moko, mpe bozalaka na nsé ya nzete moko ya pin esika moko boye, to ézala esika nini, soko ezali na ndako ya moto moko na liyangani ya nkukú, etali te pai wapi ekozala. Kitoko ná makambo wana nde ebendaka Nzambe te. Ezali bosembo ya motema, na nzela ya emoniseli, ete Yesu Klisto asili kotalisama lokola Mwana na Nzambe, Mobikisi na biso mpenza. Amen!

<sup>656</sup> Oh la la, biso... tokosilisáká yango te, soki tokei na yango ndenge wana, boye te?

<sup>657</sup> Tala bango oyo nde... Akendeki nde kuna; banje: batindami, batei wana, bato ya mayele wana, batindami oyo bandimaki te ntango Noa akendeki koteya bango mpe ayebisaki bango: “Ee, bókota na masuwa oyo.”

<sup>658</sup> Balobaki: “Bóyoka motúntuki oyo. Bóyoka fanatici wana. Ee, mbula ezelaka te. Nani asílá koyoka likambo ya boye? Ee, oh la la, biso tozangi nde mangomba? Tozali basambeli te?” Ee, bazalaki basambeli!

<sup>659</sup> Yesu alobaki ete ezelaki libota oyo elekaki na eleko wana, ekozala libota yango nde ekoya lisusu liboso na Boyei na Ye: “Ndenge ezelaki na mikolo ya Noa, ekozala bongo na boyei ya Mwana na moto. Mpo bazalaki kolia, komela, kobala, kobalisa.” Bazalaki na Reno, na Nevada, na eleko yango, esika moko boye. Bazalaki na bozoba ya ndenge na ndenge oyo bazali na yango lelo; kolobaloba, kosekisa, kotiola, batioli mpe bongo na bongo; bazali na lolenge ya kosambela, kasi bazali kowangana Solo mpenza: boyokani, Nsango ya ngolu. Nzambe kobongisáká nzela na Ye, mpe kopesáká bato boyokani na Ye—na Ye, ndenge bakokaki kokima; Ezalaki na lobiko na kati na yango, lobiko ezelaki esika ya kokimela.

<sup>660</sup> “Tozali na bosenga ya lobiko na ntina nini?” Lelo bato balobaka: “Tozali kobika na lolenge moko malamu ya boyangeli démokrati te? Tosengeli lisusu na nini?”

<sup>661</sup> Etali ngai te lolenge boni ya boyangeli ya démokrasi tozali kobika na yango, tosengeli na Makila ya Yesu Klisto. Ya solo! Tosengeli na Klisto. Nasepelaka na lolenge ya boyangeli ya démokrasi; yango etali na eloko moko te lobiko ya molimo. Ya solo mpenza! Ba-gouvernement yango ekoleka, mpe bikólo nyonso ekoleka. Nasílá kokómá pembeni na... esika ba-fálo bazaláká, mpe okosengela kotimola metre motoba na nsé ya mabelé mpo na komona ba-ngwende na bango, esika bazalaki kofanda. Ba-fálo nyonso ná ba-bokonzi na bango ya mokili oyo, ná biloko na yango nyonso ya ntango moke ekosuka mpe ekolimwa, kasi Jehovah akokonza libela na libela, mpo Azali Nzambe oyo akufaka te. Totelemi ngwi likoló na Libanga Klisto Yesu, mpo bisika mosusu nyonso ezali zelo ya kozinda.

<sup>662</sup> Ézala ata soko . . . makonzi ekotelema mpe ekokweya, kasi, oh, eloko moko te, etali te ata soki ezali eloko nyonso, eloko moko te oyo ezali, eloko moko te oyo ekoya, eloko moko te (nzala to liwa to eloko nini) ekoki kokabola biso na bolingo ya Nzambe oyo ezali kati na Klisto. Ntango moto abotami na Molimo ya Nzambe, azali lisusu ekelamo ya ntango te, kasi akómi ekelamo ya Seko. Amen. Asili kolongwa na kufa mpe koingela na Bomoi. Asili kolongwa na . . . Asili koleka na biloko ya ntango, koíngela na kati ya Seko. Akoki kokufa ata moke te! Mpe Nzambe akataki ndai ete Akosekwisa ye na mikolo ya nsuka.

<sup>663</sup> Boye, bakoki kozua mangomba na bino minene nyonso, ná ba-ntango na bino nyonso ya biyenga, mpe nyonso oyo bolingi, mpe kobeta massolo na bino ya mbindo, mpe kobeta masano na bino ya Loterie, baféti ya mpokwa mpo na komela supu ná makambo nyonso oyo bolingaka; mpe kozala ná motei moko atángá mingi kuna. Ntango mosusu akoki kosala mosala ya malamu, koleka mwa bilenge oyo bayebi ata ABC na bango malamu te. Kasi nazoyebisa bino solo, ekozala malamu názala na elenge mobali oyo ayebi ABC na ye te, áteya ngai (oyo ayebi Klisto) na esika ya bato minene nyonso ya likindo oyo bokoki kokanisa, oyo batángá mingi. Ya solo mpenza!

<sup>664</sup> Awa na Kentucky, eumeli te, mwa elenge mobali moko, oyo akokaki ata kotángá nkombo na ye moko malamu te, alobaki ete Nkolo abengaki ye mpo na koteya mpe alingaki kozala na eteyelo moko. Ee, bakonzi balingaki te kopesa ye yango. Motei monene moko mpenza boye alekaki kuna, azalaki na nkombo ya molai *boyе*, molakisi monene moko ya bonzambe, ee, bapésaki ye eteyelo yango. Na ntembe te. Asalaki mayangani ya kolamuka ya mpósó mibale, ata mondimi moko te. Tata na ye azongaki kuna, alobaki: “Sikawa, botiki ye ázua yango, ngai nafutaka mpako na ngai, nazali na makoki ya kosenga ete mwana na ngai ázua yango. Mpe mwana na ngai asengelaki kozua yango mpe.”

<sup>665</sup> Bongo, azongaki mpo na koyeba, mpe kotuna bango, balobaki: “Ee, tokotika ye ásalela yango ata mpo na mpokwa mibale.” Bakendeki mpe bapesaki ye yango mpo na mpokwa mibale.

<sup>666</sup> Mpe na mpokwa yango, mwana mobali yango atelemaki wana, akokaki ata kotángá Biblia te, moto moko nde átángelaki ye. Kasi ntango apusanaki na etumbelo, apakolamaki na Molimo Mosanto. Mpe ntango ateyaki, bato pene na ntuku mibale bayaki na etumbelo; mpe mwasi motei yango, ya lolendo, alelaki mpe akendeki kino na Kalvari, na etumbelo.

<sup>667</sup> Na ntembe te, ndeko, ezali te—ezali te makambo oyo yo oyebi, ezali nde Ye oyo oyebi. Yango nde likanisi, esengeli nde na yango, esengeli ete óyeba Klisto. Koyeba Ye, ezali Bomoi; koboya Ye, ezali liwa.

<sup>668</sup> Tózua noki-noki mituna na biso misusu, sikawa, mituna oyo ekokende na Géorgie:

**67. Mabanga oyo ezali na . . . na Emoniseli 21:19 mpe 20, ezali kotalisa nini?**

<sup>669</sup> Soki bokosepela kozua ntango ya kofungola ba-Biblia na bino, tozali na ntango mingi te mpo na yango sikawa, kasi nakomeka koyanola na yango noki-noki. Emoniseli ntuku mibale na- . . . Nabanzi ezali 21:19 mpe 20. Iyo.

<sup>670</sup> Malamu, na kati kuna bokomona ete azalaki kolobela mabanga oyo ezalaki na kati ya ndako. Mpe mabanga yango ezalaki mibóko. Soki botali malamu . . . Nabanzi ete ozali na yango kuna, Ndeko Neville. Mpe libanga moko na moko ezalaki mobóko. Libanga moko nde ezalaki mobóko te, mpe misusu . . . Kasi libanga moko na moko ezalaki mobóko. Libanga moko na moko ezalaki mobóko ya ntango nyonso. Mpe mabanga yango ezalaki zomi na mibale. Soki botali malamu mabanga zomi na mibale yango, bapesi moko na moko . . . Liboso ebandaki na jaspe, mpe sardoine, mpe bongo na bongo ndenge wana, kotalisáká libanga moko na moko.

<sup>671</sup> Na Biblia, bokomona ete mabanga yango ebenamaki na nkombo moko boye. Misusu kati na yango mwa kokesana, boyóká naino nsango na yango te. Soki botali yango na dictionnaire, bokomona ete ezali kaka libanga moko wana, kaka nkombo mosusu; ebongwani.

<sup>672</sup> Kasi ebandi na—na jaspe. Jaspe ezalaki libanga ya—ya Benjamin, to, libanga ya . . . oh, ya mwana ya liboso, Ruben. Libanga ya liboso ezalaki Ruben, elingi koloba jaspe. Libanga ya nsuka ezalaki Benjamin, libanga ya nsuka, na likoló.

<sup>673</sup> Sikawa, mabanga zomi na mibale oyo mibóko efandaki likoló na yango, mabanga yango—yangó zomi na mibale etiamaki na ntolo ya Alona. Mpe e—ezalaki kotalisa, azalaki nganganzambe mokonzi ya—ya mabota oyo. Libanga moko na moko ya mbotama na bango ezalaki awa, na—na libenga oyo. Ntango bato bazalaki komona libenga yango, bazalaki koyeba ete Alona azalaki nganganzambe mokonzi ya libota mobimba wana, ntango bazalaki komona libanga ya mbotama na libenga oyo.

<sup>674</sup> Sikawa, ndenge toyókaki na ntongo, na liteya ya Ndeko Neville. Mbala mingi, bazalaki komema Urim Tumim. Bomoni ekomami na Biblia, ndenge wana nde bazalaki koyeba soki nsango na bango ezalaki Solo to te. Mabanga yango, ntango bazalaki koloba makambo oyo moto wana alobaki, oyo mosakoli asakolaki, mabanga yango nyonso ezalaki kongenga elongo. Ezalaki kosangisa ba-pole oyo ezalaki kosala ete saphir, jaspe, escarboucle, mpe mabanga mosusu nyonso wana ébimisa pole na yango, ezalaki kosala lángi moko monene ya kitoko ya monama, oyo ezalaki kosangisa yango mobimba elongo.

<sup>675</sup> Sikawa, sikawa, lelo, lokola Urim Tumim yango elongolama, ná bonganga wana, sikawa Biblia oyo ezali Urim Thummim ya Nzambe lelo. Ntango motei moko ateyi, esengeli te kozala kaka na mwa eteni moko awa, mpe nde nyonso oyo atii elikia na ye likoló na yango; esengeli nde ézala Biblia mobimba oyo ezotalisa nsango oyo moto azali koteya. Yango nde likambo. Kaka esika moko te, mpe koloba: “Ee, Biblia elobi *boyé*.” Oh, ya solo, Elobaka makambo mingi. Kasi osengeli kosala ete mobimba na yango étiama elongo. Mpe ntango Molimo ya Nzambe eyaka mpe ekotaka na—na Liloba, Etiaka nyonso wana esika moko mpe etalisaka Pole moko ya monene mpenza, mpe Pole yango ezali Yesu Klisto. Amen.

<sup>676</sup> Sikawa, mabanga zomi na mibale oyo ezelaki mibóko zomi na mibale, oyo ebandaki na Ruben, mpe Gade, mpe bongo na bongo kino na Benjamin; mabota zomi na mibale, mabanga zomi na mibale. Mpe mabanga yango, na kati ya Tempelo, na Yelusaleme ya sika ya Likoló, moboko moko na moko ekotiamila likoló na moko na batata ya mabota.

<sup>677</sup> Sikawa bótala malamu, bótala mabanga yango, sikawa bokomona malamu ndenge batata ya mabota yango bakotálisama na eloko mosusu, na motuna mosusu.

## 68. Límbola—límbola ya minei...banyama minei ya Emoniseli 5.

<sup>678</sup> Ndeko Neville, soki ozali na yango pemberi na yo, to moko na bino, Emoniseli 5, tokotángá yango mwa moke. Ezali—ezali elilingi moko kitoko, awa, ya... Tala, ngai moko mpe nazui yango, Emoniseli mokapo ya 5:

*Mpe namonaki na loboko ya mobali na ye oyo afandi na—na ngwende, buku moko mokomami na kati mpe libanda mpe—mpe—mpe na nsima, mokangami na bilembo nsambo.*

*Mpe na...*

<sup>679</sup> Sikawa, wana ezali esika yango te. Nazali na mposa ya kokende mwa mosika, banyama minei. Tótala naino, molongo ya 14. Malamu, mesie. Sikawa yango oyo, ezali bongo. Sikawa tóbanda awa na—na molongo ya 12, te, nabanzi... “Banyama minei balobaki: ‘Amen.’” Te, mwa esika moko ezali na nsima na yango, Ndeko Neville. “Tala, nayokaki mongongo...”

<sup>680</sup> Tótala naino, mwa moke, nauti kotángá yango kala mingi te. Oh, yango oyo, tóbanda na molongo ya 6. Molongo ya 5:

*Moko na bampaka alobaki na ngai ete, Kolela te: tala, Nkosi ya libota na Yuda, Mosisá ya Dawidi, asili kolonga mpo na kofungola buku, mpe kokangola...bilembo na yango.*

*Natalaki, mpe,...na katikati ya ngwende mpe... bizàli-na-bomoi minei, mpe, na katikati ya bampaka,*

*mwana mpate atelemaki lokola asili kobomama, azalaki na mitó nsambo mpe miso nsambo, mazali Milimo nsambo... matindami uta... na mokili mobimba.*

<sup>681</sup> Nalingi ete bósimba motuna wana, mpe soki nazongeli yango te nsima na mwa miníti, nalingi ete bókanisela ngai, nalingi kolobela yango, "Milimo nsambo, miso nsambo oyo Mwana-mpate azalaki na yango." Oh, ezali mpenza likambo moko kitoko. (Ee, tolingi kozua motuna ya ndeko yango sikawa.) Malamu, bóbosana yango te sikawa.

*Akendeki mpe azuaki buku na loboko ya mobali ya oyo afandi na ngwende.*

*Mpe ntango azuaki yango, bizàli-na-bomoi minei mpe bampaka ntuku mibale na minei yango bakweaki liboso na mwana-mpate, ... moko-moko na bango azalaki na nzenze, ...*

<sup>682</sup> Sikawa, tala ba—ba—banyama minei, soki botali malamu. Sikawa tókoba mpe tótánga mwa mosika koleka:

*...nzenze ya wolo, ...etondi na mbeki mpe mpaka malasi, ...mpe mabondeli ya basantu.*

*Mpe bayembaki loyembo ya sika, ... Yo obongi... (mpe bakóbaki mpe bapesaki...kokumbamela na bango nyonso na Nkolo)*

<sup>683</sup> Sikawa, banyama minei oyo ya Emoniseli, soki botali bango malamu, esika moko na moko... (Bino batángi Biblia, mpe moto oyo akoyoka bande oyo). Banyama minei wana, bizalaki na bilongi minei: moko azalaki na elongi lokola moto, mosusu azalaki na elongi lokola ngombe, mpe elongi mosusu ezalaki lokola mpongo, mpe elongi mosusu ezalaki lokola nkosi. Mpe bazalaki kozonga nsima te, bakokaki kozonga nsima te.

<sup>684</sup> Bato boni bazali komikanisela buku ya kala ya Emoniseli, ntango batéyáki yango eleki mibu ebele, ntango nazuaki pene na mibu mibale awa, likoló na Buku ya Emoniseli? Bato ya kala mingi bazali komikanisela.

<sup>685</sup> Bótala, bakokaki kozonga nsima te, mpo ngámbo nyonso bazalaki kokende, bazalaki kokende liboso. Soki bakei na ngámbo oyo, bazalaki kokende lokola moto; soki bakei na ngámbo oyo, bazalaki kokende lokola nkosi; soki bakei na ngámbo oyo, bazalaki kokende lokola mpongo; soki bakei na ngámbo oyo, bazalaki kokende lokola ngombe. Bomoni, bakokaki kozonga nsima te, bazalaki ntango nyonso kokende liboso.

<sup>686</sup> Sikawa, banyama minei yango. Sikawa tólobela yango na lombangu, mpo nalingi kolekisa ntango molai mpenza te na likambo oyo. Kasi banyama minei... *Nyama*, na Biblia, etalisaka "nguya". Soki botali malamu, banyama oyo bazalaki kuna na láki to na mbu te, esika moko boye, bautaki

kuna te, kasi bazalaki liboso na Ngwende ya Nzambe, mpe bazalaki kosambela Nzambe. Banyama minei yango elingi koloba banguya minei oyo emataki uta na mabelé, mpe banguya minei yango ezalaki Nsango-malamu minei: Matai, Malako, Luka ná Yoane; moko etelemelaka mosusu te.

<sup>687</sup> Mpe moko na bango, e... Wana Nsango-malamu esakolamaka lokola nkosi, ezali na ekenge, ezali mpiko; Nsango-malamu ezalaka na mpiko lokola nkosi, mpe ezalaka mokonzi lokola nkosi. Soki ekei na elongi ya moto, ezali na mayele mpe na makoki lokola moto. Soki ekei lokola mpongo, ezalaka na mapapu ya mbangu mpe emataka likoló mingi. Yango . . . Bomoni eloko nini nalingi koloba? Soki ekei lokola ngombe, ekómaka mpunda ya mosala, oyo ekoki kobenda, ngombe ya mosala, oyo ebendaka mo—mo—mokumba ya Nsango-malamu. Banyama minei ezalaki banguya minei, elingi koloba: Matai, Malako, Luka ná Yoane; Nsango-malamu minei oyo ebélélaka Liboso na Nzambe. Ezalaki . . .

<sup>688</sup> Soki botali malamu, bazalaki na miso na liboso mpe na nsima. Bango—bango . . . Bipai nyonso ezalaki kokende, ezalaki kotalisa yango. Bazalaki komona bisika nyonso bazalaki kokende. Mpe yango nde nguya ya Nsango-malamu, ntango etatolamaka, ekoki . . . Ezali na mayele ya moto; ezali na mbangu ya mpongo; ezali na—na—na—na nguya, nguya ya kobenda, momemi mikumba lokola ngombe; ezali na—na ekenge mpe mpiko ya nkosi. Bomoni, ezali Nsango-malamu minei, elingi koloba ba-nguya minei ya Emoniseli, mokapo ya 4.

Malamu, sikawa oyo elandi:

**69. Bampaka ntuku mibale na minei bazali banani?** Malamu, nabanzi ete ekozala na—na . . . **Bampaka ntuku mibale na minei bazali banani?**

<sup>689</sup> Sikawa, oyo ezali mpenza pete, tokoki kozua yango. Bampaka ntuku mibale na minei bafandaki liboso na Ngwende. Ezali na . . . Nabanzi ete ekomami na molongo ya 4. “Mpe mosusu abimaki . . .” Nasengeli ko . . . Tótala, Nazali na . . . 4:10.

<sup>690</sup> Malamu, Emoniseli, mokapo ya 4, mpe molongo ya 10. Ya solo. Tokozua yango.

*Mpe bampaka ntuku mibale na minei bakweaki liboso na ye oyo afandaki na ngwende, mpe basambelaki ye oyo azali na bomoi libela na libela, mpe babwakaki mitole na bango liboso na ngwende, balobaki:*

*Obongi, E Nkolo, kozua nkembo mpe lokumu mpe nguya: mpo yo ozalisaki biloko nyonso, mpe mpo na mokano na yo yango ezali mpe ezalisamaki.*

<sup>691</sup> Sikawa bampaka ntuku mibale na minei. Mpaka azali mosenzeli. Sikawa bótala, ezalaki batata ya mabota zomi na mibale ná bantoma zomi na mibale. Mpe bafandaki, zomi na

mibale na ngámbo moko mpe zomi na mibale na ngámbo mosusu. Ezalaki na bampaka ntuku mibale na minei, elingi koloba batata ya mabota zomi na mibale na ngámbo moko, Kondimana ya Kala, bantoma zomi na mibale na ngámbo mosusu, ya Kondimana na Sika. Yesu alobaki te ete: “Bokofanda na bangwende zomi na mibale, mpo na kosambisa mabota zomi na mibale ya Yisraele”?

<sup>692</sup> Sikawa, miboko. Bótala, ezali ata na nzete moko kuna na kati. Mpe nzete na ngámbo nyonso mibale ebotaka lolenge zomi na mibale ya mbuma. Mpe bapesaka mbuma na bango mbala moko na sanza, elingi koloba sanza zomi na mibale na mobu. Bapesaka lolenge zomi na mibale ya mbuma na mobu moko na moko wana ekokóba. *Zomi na mibale* ezali motángó wana ya “kosambela,” bomoni. Mpe bazali ntuku mibale mpe minei, epesi ntuku mibale na minei, bantoma zomi na mibale ná batata zomi na mibale. Bafandi liboso na Ngwende.

<sup>693</sup> Malamu, sikawa molongo ya 4, to, motuna ya minei:

## 70. Eteni ya nsinga ya motane na Genese 38 ezalaki kotalisa nini?

<sup>694</sup> Nsinga ya motane, soki botali malamu, ezalaki Yuda. Azalaki na bana mibali mibale, moko na bana na ye abalaki mwasi moko ya Kanana. Mpe Mokanana oyo azalaki na bana te, mpe mwana na ye ya mobali akufaki. Bongo, na eleko wana, mobeko elobaki ete asengelaki kozua . . . ete mwana mobali oyo alandi asengelaki kozua mwasi ya ndeko na ye, mpo na kobótela mowei bana. Kasi mobali yango aboyaki likambo yango, mpo na kosala oyo asengelaki kosala, mpe Nkolo abomaki ye. Bongo azalaki na mwana mobali moko ya moke; boye, Yuda alobaki: “Zela kino mwana oyo ákóma . . . ákóla, kino ntango okokoka kobala ye.”

<sup>695</sup> Mpe ntango akólaki mpe akómaki na esika oyo asengelaki kobala mwasi ya bandeko na ye mibale ya mibali, ee, na bongo asengelaki sikawa kozua ye, mpo ábota bana mpo na bandeko na ye oyo basilaki . . . oyo basilaki kokufa liboso na ye. Yuda apesaki mwasi yango (mwasi Mokanana yango) mwana na ye ya mobali te, elenge mobali yango, mpe atikaki mwana yango ásala ndenge alingi. Boye, mwasi yango ayebaki ete azalaki kosala mabe, bongo abimi mpe amizipi kitambala na elongi, mpe afandi na esika ya bato nyonso lokola mwasi ya ndumba.

<sup>696</sup> Yuda ayaki wana mpe azuaki mwasi yango lokola mwasi na ye, mpo ye azalaki lokola mwasi ya ndumba, mpe abikaki ná ye. Mpe alobaki, mwasi yango alobaki: “Ee, okopesa ngai nini?” Mpe mobali . . . mwasi alobaki . . .

<sup>697</sup> Mobali alobaki: “Nakopesa yo mwa—mwana ya ntaba.” Alobaki: “Ee, pesa ngai elembo moko ete okosala yango.” Boye, mwasi azuaki língénda na ye, ná lopété ya elembo na ye mpe bongo na bongo, mpe abóbaki yango.

<sup>698</sup> Mpe ntango bayaki na mwana ntaba yango, bamonaki mwasi ya ndumba yango te, mpo azalaki na ye mwasi ya ndumba te.

<sup>699</sup> Nsimá na mwa ntango, atalisaki bilembo ete azalaki na zemi. Mpe ntango atalisaki bilembo ete azalaki na zemi, bayaki koyebisa Yuda ete: "Bokilo na yo asili kosala kindumba." Balobaki: "Mpo a—azali na zemi, nzokande bana na yo mibale ya mibali basílá kokufa."

<sup>700</sup> Alobaki: "Ee, akobéngama libanda, mpe akotumbama."

<sup>701</sup> Na bongo, mwasi yango atindaki maloba epai ya Yuda, alobaki: "Mobali oyo asali likambo oyo, azali mokóló lingenda oyo ná lopété ya elembo oyo." Malamu, ezalaki nde tata-bokilo na ye.

<sup>702</sup> Mpe alobaki: "Mwasi yango azali sembo koleka ngai."

<sup>703</sup> Sikawa, ntango mwasi ayebaki ete bana na ye basengeli kobótama, bazalaki mapasa. Mpe ntango lipasa yango... Mwana ya liboso oyo asengelaki kobotama, kokokana na bonkoko ya kala ya Bayuda, mwana ya liboso azalaka na makoki ya bokulutu, mwana ya liboso oyo amonani. Mpe oyo wana, bómikanisela, azalaki mwana na ye ya liboso. Ata moko te na bana mibali yango abótáká bana ná ye. Atikálá kobota mwana moko te kino na ntango oyo.

<sup>704</sup> Mpe ntango mwana na ye ya liboso amonanaki, ezalaki bobele loboko. Mobotisi akangaki yango nsinga ya motane makasi, mpamba te eteni ya nsinga ya motane ezalaki kolobelá lisiko, ete mwana ya liboso ya mongondo Maria akozala... kozala na nsinga ya motane makasi ya lisiko.

<sup>705</sup> Mpe ntango abendaki loboko na ye na kati, mwana mosusu nde ayaki liboso. Mpe ntango asalaki bongo, mama alobaki: "Mpo na nini osali boye? Oyo mosusu nde azali na makoki ya bokulutu."

<sup>706</sup> Boye, yango nde Genese 38 elingi koloba, bomoni, ete mwana ya liboso, mpe etikalaki bongo kino na boyei ya Nkolo Yesu Klisto, ete mwana ya liboso ezalaki na nsé ya mobeko ya lisíko.

<sup>707</sup> Boyebi, nalobaki... mwa mbalata-mpunda, boyebi, oyo nalobelaki, ete miso na ye ezalaki... soki ndenge nini, matoi na ye ekwéyá, kasi, soki abotamaki ná makoki ya bokulutu, mwana-mpate oyo asali mabe te, oyo abongi be, akufaki na esika na ye. Yango mpenza.

<sup>708</sup> Boye, wana ezalaki mpo na makoki ya bokulutu. Mwana ya liboso oyo amonanaki mpo na kobima na mama, bamonaki loboko yango (mpe bayebaki ete ekokaki kozonga lisusu). Mpe ntango apusaki loboko mpo na kolakisa ete azalaki na yango, ete azalaki mwana ya liboso, mobotisi akangaki yango nsinga ya motane, mpe abendaki loboko na ye na kati. Bomoni? Kasi, na ntembe te, azalaki mwana ya liboso. Ezalaki nsinga ya motane,

nsinga ya motane ezali na . . . na Biblia mobimba, elingi koloba lisiko; ezalaki kosakola boyei ya mwana ya liboso.

<sup>709</sup> Mpunda ya liboso oyo ezalaki kobotama, ngombe ya liboso oyo ezalaki kobotama, ézala soko nini, nyonso oyo ezalaki kobotama liboso (oyo ezalaki koya) ezalaki na nsé ya lisiko, esengelaki kosikolama; nyonso esengelaki kosikolama! Aleluya! Oh, ezali kopesa ngai nsái. Bososoli yango? Oyo *ya liboso* esengelaki kosikolama. Ezalaki mobeko. Nkombo na Nkolo épambolama!

<sup>710</sup> Mpe ntango Yesu Klisto abotamaki, Asikolaki mokili mobimba. Na ntembe te, Asalaki yango. Azalaki Mosikoli ya bikelamo nyonso oyo esílá kokelama na mokili. Azalaki Mosikoli. Mpe na . . . lisiko mobimba ezali kati na Ye, mpe okoki koya na nzela mosusu ata moko te, ata na nzela na misala malamu te, ata na nzela ya kokota na lingomba te, to ézala ata soko nini; osengeli koya na nzela na nsinga ya motane wana, Mosikoli wana, tata Mosikoli wana.

Malamu, sikawa motuna oyo elandi ezali:

**71. Makabo ezali wapi . . . Makabo nini esengeli kotindama, na oyo etali liwa ya batatoli mibale ya Emoniseli 11?**

Oh, Ndeko Palmer, yo okoki kotuna mituna mpenza!

<sup>711</sup> Sikawa, lisiko, bansinga oyo, nsinga motane oyo, tomoni ete elingaki koloba lisiko.

<sup>712</sup> Sikawa motuna oyo elandi ezali:

**Makabo na Emoniseli 11 ezali nini?**

<sup>713</sup> Ntango moko ezali koya . . . Sikawa, oyo ekoyanola na motuna oyo eyanolamaki mokolo wana na mpokwa, oyo moninga na ngai motei moko akomaki na ntina na Bayuda, ndenge ekozala.

<sup>714</sup> Sikawa Bayuda yango bazali na mibu misato na ndambo oyo elakamaki mpo na bango. Bato boni bayebi yango? Mpóso ntuku nsambo elakámáki. Elabaki: “Masiya akoya mpe akolongolama na katikati.” Klisto ateyaki mibu misato na ndambo, abomamaki nsima na mibu misato na ndambo mpenza, Ateyaki mibu misato ná sánzá motoba.

<sup>715</sup> Nsimma na yango, mbindo ya libebisi, mo—mosquée ya Omar etiamaki na Mabelé Mosanto; ndenge Nzambe alobaki, mibu nkoto mibale na nkama mitano liboso ékokisama, ete ekozala wana. Mosakoli amonaki yango, amonaki yango, mpe alobaki ete bango, ete ekokómána maboko ya bato ya Mabota kino eleko ya Mabota ekosila.

<sup>716</sup> Sikawa, ezali naino na mibu misato na ndambo oyo elakamaki. Soki botali malamu, batatoli oyo ya Emoniseli 11 bakosakola mikolo nkoto na nkama mibale na ntuku motoba; mibu misato na ndambo mpenza. Sikawa . . . mpe balataki sáki.

Sikawa, bótala lotómo na bango, oyo bango bazali. Sikawa, batatoli mibale yango babomami.

<sup>717</sup> Sikawa, e...Bazongaki epai na Bayuda nsima na Konetolama ya Lingomba ya Mabota. Lingomba ya Mabota ezongi na Ndako mpo na Elambo ya Libala, mpe ndenge Rebeka amemamaki na ndako ya Abraham ná Yisaka, mpe kuna, babálanaki. Mpe Rebeka ná Yisaka basangolaki biloko nyonso oyo Abraham azalaki na yango, nyonso ekendaki epai ya Yisaka. Ya solo mpenza! Ekokaki kokóma ya Yisaka te liboso Yisaka ábala. Oh aleluya! Yango wana mpenza.

<sup>718</sup> Mpe Klisto akómi...Nzambe afandaka na kati ya nzoto oyo ebongi be, ebebisami mobimba libela mpe kati na Seko Ntango Mwana-mpate ná Mwasi na libala bakobalana na Lólá, Mwasi akosangola bozwi nyonso. Ya solo mpenza! Yisaka ná Rebeka basangolaki biloko nyonso.

<sup>719</sup> Mpe wana molulu yango ezali kosalema na Likoló, ya Mwasi na libala, Mwasi na libala ya Mabota azali kobálana ná Mwana ya Mokonzi (Mwana na Nzambe), na Nkembo; wana bazali kobalana, mibu misato na ndambo ekoleka na ntango oyo... Móse ná Eliya...

<sup>720</sup> Elingi koloba, Mose azángáki ata moke te...te, nzoto na ye ememamaki. Banje bazuaki ye, abébaki te, apoláki te. Azalaki elilingi ebongi be ya Klisto. Akufaki mpe Banje bamemaki ye, mpe ata zabolo ayebi ata te esika oyo akundámáki, mpe amekaki kowélana ná Mikaele mokóló na Banje na ntina na bokundami na ye. Yango nde oyo Biblia elobaki. Nzambe amemaki ye na Konetolama.

<sup>721</sup> Mpe Eliya, ntango azalaki kotambola kuna, mosakoli ya Nzambe, akendeki téé na Yolodani, alongolaki monkóto na ye mpe abetaki mai, mpe ekabwanaki na ngámbo ya mobali mpe ya mwasi. Amataki na likoló ya ngomba. Elisa alobaki...Alobaki: "Ozali kolanda ngai mpo na nini?"

<sup>722</sup> Alobaki: "Nazali na mposa ya ndambo mibale ya Molimo na yo."

<sup>723</sup> Alobaki: "Osengi likambo moko ya makasi, kasi soki omoni ngai ntango nakokende." Azalaki kotala ye ntango nyonso.

<sup>724</sup> Mpe nsima na mwa ntango, likálo ya móto ekitaki longwa na Likoló, ná Banje ya móto mpe ba-mpunda ya móto, mpe Eliya akotaki mpe amataki na Nkembo. Alétaki liwa ata moke te, anetolamaki, asengeli kokufa!

<sup>725</sup> Mpe soki botali malamu basakoli mibale oyo ya Emoniseli 11, bakosala mpenza makambo moko oyo Móse ná Eliya basálaki. Okoloba: "Ndeko Branham, olingi koyebisa ngai ete Eliya ná Mose bazali na bomoi kino lelo?" Na ntembe te!

<sup>726</sup> Ee, liboso na Ngomba ya Mbongwana...Na Ngomba ya Mbongwana, liboso Yesu ákende na Kalvari, Mose ná Eliya

batelemaki wana, bazalaki kosololáká ná Ye. Na ntembe te, basalaki yango, bakúfá te. Mpe batikálá kokufa te; bazali bato na kufa, basengeli kokufa. Boye, bazali kaka na lolenge oyo ekembisami, kozeláká ntango yango.

<sup>727</sup> Na bongo, ntango bakoya lisusu koteya mpenza mibu misato na ndambo, na nsé ya epakweli ya libatisi ya Molimo Mosanto, wana mapamboli elongolami epai na bato ya Mabota (mpe Lingomba esili konetolama); mpe lingomba ya malili mpe ya nkombo bakolanda bango lokola bambwa, na lingomba ya ba-communiste mpe Roma, na ntango wana nde bakolukama mpe bakoboma bango. Bongo ba—bakobomama; basakoli oyo bakoteya mibu misato na ndambo, mpe Biblia elobi ete babomámáki na monene...na balabala, oyo ebengami na molimo, Sodoma mpe Ezipito, epai wapi Nkolo na biso abakámáki na ekulusu. Wana ezali kuna na Yelusaleme; bomoni, kuna na Yelusaleme, ndenge ebengami na molimo.

<sup>728</sup> Mpe baláláki na balabala mikolo misato mpe butu misato. Na bongo na nsuka ya mikolo misato na ndambo, molimo ya bomoi ekótaki kati na bango mpe basékwaki. Basengelaki kokufa lokola bato mosusu ya kufa, basengelaki kokufa. Mpe ntango babomaki batei mibale yango...

<sup>729</sup> Na mateya na bango, batelemelaki mabe, mpe bakitisaki móto uta na likoló. Nani asalaki yango? Bomoni? Bakitisaki malózi uta na likoló, mpe babetaki mabelé na lombangu...mpe na ntango nyonso oyo balingaki. Bakitisaki móto uta na likoló. Mpe bakangaki likoló mpo mvula ébeta te, na ntango nyonso oyo balingaki. Oyo wana ezalaki nani? Ezalaki mpenza Mose ná Eliya. Mpe bango nde bazali batatoli mibale yango.

<sup>730</sup> Mpe ntango batungisaki lingomba, to mokili, na mateya na bango, mpe bayambaki lisusu Bayuda, mpe bamemáki bango na kobongola motema, bazongisaki bango na kondimela...Ntango bakomona Yesu koya kozua Mwasi na libala, bakoloba: “Tala, oyo nde Nzambe na biso Oyo tozalaki kozela. Ezali Ye!” Kasi Azali koya mpo na bango te; Akoya mpo na Mwasi na Ye ya libala. Mpe Mwasi na Ye ya libala...

<sup>731</sup> Ntango Yosefe akendeki na Ezipito, amemaki bandeko na ye elongo na ye te, kasi abáláki mwasi na ye kuna. Ya solo mpenza! Kasi ntango amitalisaki epai ya bandeko na ye, moto moko te azalaki wana. Ezali mpenza ya solo. Mpe ntango Ye akomitalisa Ye moko epai na Bayuda oyo, moto moko te akozala kuna, bobele Bayuda. Baoyo babomáká Yosefe bazali wana, batelemaki wana; mpe alobaki: “Ee, ngai nde Yosefe, ndeko na bino.” Mpe alelaki.

<sup>732</sup> Balobaki: “Sikawa toyebi ete tobibi na biso, mpo tobomaki ye.”

<sup>733</sup> Ndenge moko, Bayuda wana bakoleka na ntango ya mpasi mingi, kaka liboso na boyei sikawa, ya minyoko oyo ekozongisa

bango na mabelé na bango. Ezali kobengana bango lokola etonga ya bampate mpo bázonga kuna na Ngomba Karmele.

<sup>734</sup> Ntango Nkolo Yesu akoya kozua Mwasi na Ye ya libala, mpe bango bakomona Ye, bakoloba: “Ye oyo biso tozalaki kozela, Ye wana!” Akotelema ná lobiko ya nzoto na mapapu na Ye. Ya solo.

<sup>735</sup> Mpe lingomba, litíka ya Bayuda, sukasuka ntango bakoboma basakoli mibale oyo, mpe bakolala na balabala oyo ebengami na molimo Sodoma mpe Ezipito, epai wapi Nkolo na biso abakamaki na ekulusu, bakotindelana makabo bamoko na bamosusu (bato ya mokili bakosala bongo).

<sup>736</sup> Sikawa, Ndeko Palmer, yango oyo. Tala lisusu na histoire ya Roma, mpe okomona ete ezali na ekólo bobele moko na mokili mobimba, oyo etikálá kotinda makabo nsima na etumba, wana ezali Bokonzi ya Roma.

<sup>737</sup> Yango nde ntina nalobaka ete motemeli-na-Klisto auti na Roma. Nyama auti na Roma, akoki kouta na Moscou te. Auti na Roma, dalagóna motane oyo atelemaki liboso na mwasi wana mpo na koliá Mwana na ye kaka ntango akóbótama. Molimo mabe yango, molimo mabe yango azalaki wapi? Ezalaki nani? Kaisala Auguste oyo atindaki ete báboma bana mike nyonso oyo bazalaki na nsé ya mibu mibale. Dalagóna motane, dalagóna yango, *nyama elingi koloba “nguya”*. Nguya ya Roma enyokolaki mpe ezalaki koluka Mwana wana, Klisto.

<sup>738</sup> Mpe likambo yango moko! Ntango nyonso oyo Baroma, Baroma ya bopakano ya kala bazaláká kozua elonga monene, bazalaki kotinda mabanga ya mpembe mpe biloko nyonso mosusu bamoko na bamosusu, lokola makabo ndenge wana, lokola bikaniseli. Boye, mabanga yango, oyo ezalaki... Oyo yango ezalaki, ezalaki mwa makabo oyo bazalaki kotindana na kati ya lingomba ya Roma. Ya solo mpenza! Ya solo mpenza. Na ntembe te;

<sup>739</sup> Nazalaki kuna, na Engumba ya Vatican, mpe nalukaki koyeba yango na Biblia. Pápa alátáka mitole misato kati na moko, *Vicarius Filii Dei*, makambo nyonso oyo nasilá koyoka mpe bongo na bongo, ezali mpenza solo; lisanga moko ya basámbeli, oyo ekonzaka bikóló nyonso na nsé ya Lola, mpe ezali bongo. Yango mpenza, ezali bongo.

<sup>740</sup> Naza na likambo moko te esóngó na ba-Katoliko (te, misie), bazali mpenza bato malamu lokola bato mosusu nyonso, kasi eyamba na bango ezali libunga, kokokana na Biblia oyo. Soki Biblia oyo ezali solo, bango bazali na libunga. Balobaka ete bango... “Etali te nini Biblia elobi, ezali nde oyo lingomba elobi.” Biso tondimaka ete Biblia elobaka na bokonzi ya likoló koleka! Na ntembe te, ezali Liloba na Nzambe.

<sup>741</sup> Boye, bomoni kuna, mabanga oyo etindamaki na ntango yango, na Emoniseli awa, ezali ma—mabanga oyo ezalaki makabo oyo bazalaki kotindana bamoko na bamosusu. Ezali

bobele kotalisa . . . Biblia elobaki, Emoniseli awa, elobaki: "Tika ete ye oyo azali na bwanya átángá motángó ya nyama yango. Tika ete ye oyo azali na bwanya ásala *boye-na-boye*. Ye oyo azali na molimo ya makabo moko ásala *boye-na-boye*." Bomoni ndenge lingomba ezangaka makambo mingi?

<sup>742</sup> Elenge mobali moko atunaki ngai na ntongo, na ntina na makabo ya molimo, na ntina na minoko ya sika. Elenge mobali moko, ya sembo mpenza, nabanzi ete akozala motei moko na mikolo oyo. Mpe na ntina na lingomba, nalobaki: "Mingi kati na yango ezali mosuni. Tolungi yango te, kasi tolungi eloko ya solosolo. Tozali na mposa na yango makasi."

<sup>743</sup> Okoki kobanda koteya yango na lingomba te; noki-noki, okomona moko azali na minoko ya sika, mosusu azali na loyembo, na bongo osengeli kobunda mpo na kobimisa likambo yango. Kasi ntango Nzambe apesi likabo na bonsomi nyonso, ekomitalisa polele yango moko. Ya solo. Bomoni, oyo wana ezali makabo ya Nzambe, yango nde eloko oyo Ye atindaka na Lingomba mpo na kolóngá.

<sup>744</sup> Sikawa, motemeli-na-Klisto azalaka na eloko moko lokola kondima to koboya, azalaka na lolenge ya—ya—ya mabe ya kosala yango. Mpe wana nde bokonzi ya Roma, oyo etindelanaka makabo bamoko na bamosusu, makabo ya mokili. Nzambe atindaka makabo ya molimo na balóngi; ba-Roma batindelanaka makabo ya mokili bamoko na bamosusu.

<sup>745</sup> Biso tondimaka ete Molimo Mosanto ezali Molimo, ete toyambaka Yango na nzela ya libatisti oyo euti na Likoló.

<sup>746</sup> Lingomba Katoliko eteyaka ete: "Ukarístia esantu nde nzoto ya Klisto; ete ntango olei lipa oyo kosher, yango *ezali* Molimo Mosanto, Molimo Mosanto, ukarístia esantu." Bomoni?

<sup>747</sup> Biso tondimaka ete ezali eteni ya lipa, tondimaka te ete ezali nzoto ya Klisto, (tokolia yango, nsíma na miníti moke). Tondimaka ete etalisaka nzoto ya Klisto. Kasi ezali te . . .

<sup>748</sup> Yango nde bokeseni katikati na malakisi ya ba-Katoliko ná ba-Protestant. Bomoni? Lingomba Katoliko elobaka: "Nzoto ezali . . . Lipa *ezali* nzoto yango mpenza. Lingomba ezali na nguya ya kobongola yango." Bosilá komona mo-Katoliko koleka pemberi ya ndako-a-nzambe, kogumba motó, kosala elembo ya ekulusu? Ezali mpo mwa mwinda wana ezali kopela na kati ya ndako-a-nzambe, na nsé ya mwa mongombo wana. Ezalaka na mwa mwinda moko na kati, ná lipa kosher oyo ezalaka na kati. "Mpe yango nde nzoto ya Klisto. Mpe na ntango olie yango, olie nde nzoto ya Klisto mpenza, na kokúla komunio na yo ya liboso mpe ba batúbélá na yo mpe bongo na bongo. Ozali kolia, mpenza mpenza, nzoto ya Klisto."

<sup>749</sup> Biso tolobaka ete *etalisaka* nde nzoto ya Klisto, bomoni, ete ezali eloko mosusu te, bobele eteni ya lipa. Mpe etali te soki

ezalaki ata lipa, soki ezalaki eloko mosusu, esengelaki kotalisa yango kaka ndenge moko. Ezali—ezali mpenza bongo. Ezala...

<sup>750</sup> Lokola bato oyo balobaka: “Naboi kobatisama na pisíne, nalingi kobatisama na ebale.”

<sup>751</sup> Bokeseni nini yango ekosala, na ntango nyonso oyo osili kobatisama? Soki ezali na pisíne, mpe... Ee, Filipo abatisamaki na pisíne... ntango mokube abatisamaki. Ntango Filipo abatisaki mokube na pisíne, Molimo Mosanto anetolaki ye na lolenge ete Amemaki Filipo, bamonaki ye lisusu te nsima na kilometre nkama misato. Amemaki ye na Molimo, apesaki ye li—likálo kouta na Likoló, na kilometre nkama misato. Amen. Kitoko mingi!

Sikawa:

**Basantu bakozala wapi nsima na bokonzi ya mibu nkoto?**  
**Mpe bakozala na nzoto ya ndenge nini?** Nakozongela yango nsima na mwa ntango. [Ndeko Branham ayanoli na motuna oyo na paragraphe 820, lokola motuna 74—Mok.] Bakozala elongo ná Yesu.

<sup>752</sup> Malamu, mo—motuna ya nsambo:

## 72. Tokosambisa banje ndenge nini?

<sup>753</sup> Ezuami na... Tokosambisa banje ndenge nini? Lokola tozali bana mibali mpe bana basi ya Nzambe. Banje bazali basali; biso tozali bana mibali mpe bana basi ya Nzambe. Mpe Biblia elobaki ete tokosambisa banje. Ya solo. Sikawa, sikawa soki bo...

Motuna ya 8:

## 73. Mpo na nini nsuki mpo na banje ya Bakolinti ya Liboso?

<sup>754</sup> Sikawa moto moko álukela ngai Bakolinti ya Liboso, mo—mokapo ya 11, mpe tokomona kuna, ete bokomona ete mo—mo... Na Bakolinti ya Liboso, mo—mokapo ya 11, tomoni ete Polo nde azali koloba. Bótika názua yango mwa moke, na nsima tokotanga yango na lombangu, na bongo toko—tokozala na yango.

<sup>755</sup> Nazali na likambo moko ya koloba mpo na molongo mosusu oyo, nazali kolikia ete Nkolo akopesa biso yango ndenge tosengeli kozala na yango. Soki moto moko amoni yango... Nakanisi ete ezali mokapo ya 11, iyo, malamu. Sikawa bójoka na bokebi, na bokebi mpenza sikawa, mpo bósosola. Sikawa, bázua lisosoli na bino nyonso mpe bótia yango na libenga ya kazaka na bino, kino nsima na ngai kotanga oyo, bomoni, kino násilisa kolobelá Yango. Bójoka na bokebi mpenza, oyo ezali YANGO ELOBI NKOLO:

*Bójala balandi ngai, ndenge ngai... nazali kolanda Klisto.* (Polo alobaki: “Bólanda ngai, kaka ndenge ngai nazali kolanda Klisto.”)

*Nazali kokumisa bino mpo ete bokanisaka ngai kati na makambo nyonso, mpe kotosáká malako, ndenge napesaki... epai na bino.*

*Kasi nalingi ete bóyeba, ete motó na mobali nyonso ezali Klisto; mpe motó na mwasi ezali mobali; mpe motó ya Klisto ezali Nzambe.*

<sup>756</sup> Bomoni ndenge ezali? Nzambe, Klisto, mobali, mwasi. Sikawa:

*Mobali nyonso oyo azali kobondela to kosakola wana motó na ye ezipami, azali koyokisa Klisto nsóni.*

*Kasi mwasi nyonso oyo azali kobondela to kosakola ná motó na ye ezipami te, azali koyokisa nsoni motó na ye:...*

<sup>757</sup> Sikawa tokozua mwa ntango, mpo na kotalisa bino ete nsuki ya mwasi nde ezipelo na ye:

*...mpo na wana...ezali mpenza lokola ete asilaki kokolola motó. (Elingi koloba, soki—soki alingi kokátá nsuki na ye, boye, ákokola motó.)*

*Mpo soki mwasi azipi motó te, tika ete ákolola motó: (kokólola elingi koloba kokókola, bomoni)...kasi soki ezali nsoni mpo na mwasi kokólola to kokókola motó, tika ete ázipa motó.*

<sup>758</sup> Sikawa tozokoma mpenza na motuna oyo ozotuna awa. Bomoni? Malamu, sikawa ezali mabe mpo na—mpo na mwasi kokata nsuki na ye, kokokana na Biblia. Sikawa bóyoka awa mpe bótala soki Nzambe apesi te na mobali makoki ya mobeko ya kolongola mwasi na ye na libala soki mwasi akati nsuki na ye, bótala soki ezali bongo to te.

*Soki mobali...Mpo mobali asengeli kozipa motó na ye te (elingi koloba, kozala na nsuki milai), mpamba te ye azali na elilingi mpe na nkembo ya Nzambe: kasi mwasi azali na nkembo ya mobali. (Bosilá kakanisa na ntina na yang?)*

<sup>759</sup> Sikawa nalingi kotelema awa, mpamba te nalingi ete ékota malamu mpenza, bomoni. Sikawa bómikanisela, namóná basi kitoko nkoto ntuku na ntuku (nayebi bango sikawa, mpe mingi na bango bafandi kati na losambo oyo) oyo bazali na nsuki mikuse, oyo bazali Baklisto. Mpe natii mokumba yango likoló na bino te, ezali nde lolenge oyo boteyámá. Bomoni? Ezali bongo. Motei na bino atikálá koyebisa bino oyo te. Kasi soki basi oyo bayáka na tabernacle ndenge wana, na bongo, bakweisami. Bomoni, mpo biso toyebisaka bango mpenza likambo yango.

<sup>760</sup> Sikawa, sikawa bótala likambo oyo:

*...mobali...Mpo...(molongo ya 7)...Mpo mobali...*

<sup>761</sup> Sikawa, nani azali koloba awa? Sikawa, ekoki kosalema ete mwasi moko áloba: "Oh, Polo azalaki mobange moko moyini-ya-basi."

<sup>762</sup> Ee, sikawa, wana tozali kolobelala yango, tika tóbalola awa na Bagalatia 1:8, mpo tómoma oyo Polo alobi na ntina na yango, bomoni, na Bagalatia 1:8. Bokomona ete Polo alobaki awa na Bagalatia 1:8:

*...soko biso, to mwanje ya likoló, akoteya nsango-malamu mosusu libanda na oyo esili bino koyoka, tika ete álakelama mabe.*

<sup>763</sup> Sikawa bópamela ngai te, bópamela nde Ye, bomoni.

*Mpo mobali mpenza asengeli kozipa motó na ye te, mpo ete ye azali na nkembo mpe na elilingi ya Nzambe: kasi mwasi azali na nkembo mpe elilingi ya mobali.*

<sup>764</sup> Sikawa bótala molongo oyo elandi:

*Mpo mobali auti na mwasi te; kasi mwasi nde auti na mobali.*

*Mpe lisusu, mobali azalisamaki te mpo na mwasi; kasi mwasi asilaki kozalisama mpo na mobali.*

<sup>765</sup> Sikawa, nalingi koloba boye sikawa na bolingo ya solosolo mpe ya bopolو, mpe nákolikia bokososola yango ndenge nazali koloba yango. Kasi Amerika . . . Lokola moto oyo asalaka mibembo na mokili mobimba, Amerika ezali na moko na mibeko ezangi lokumu, ya nsoni, mpo na basi na yango, koleka bikólo nyonso na mokili. Paris, na France ekoki kozala likoló mingi kokokana na ndenge Amerika etikaka basi na yango básala. Ezali nsóni!

<sup>766</sup> Bosílá kososola ete nzambe ya Amerika ezalaka mwasi? Nakoki kotalisa bino yango polele na Biblia oyo. Ya solo. Bozali kososola ete esengeli kokóma bongo mpo lingomba Katoliko ékoka kokotisa malakisi na yango ya mongondo Maria?

<sup>767</sup> Sikawa, soki mwasi asalemaki te mpo na mobali, na . . . Soki mobali asalemaki te mpo na mwasi, kasi mwasi asalemaki mpo na mobali, na bongo ndenge nini bokosámbela mwasi? Bomoni? Sikawa, eloko esáláki yango, ebandaki na Paris mpe ekitaki lokola mpepo na Hollywood. Sikawa Paris nde esengeli koya na Hollywood mpo na kozua midéle na yango mpe kozua móde na yango mpe nyonso wana, yango nde kosila ya basi na biso ya Amerika.

<sup>768</sup> Ezali nini? Ekólo na biso ekómi moke mpenza na lolenge ete basi basili kutu kobótola mibali misala, mpe batii basi na bisika yango, na lolenge ete ntuku libwa likoló na monkama kati na bango, bazali basi ya ndumba. Mpe tólobela ete mibali basili, ya solo, ezali mpo batii basi kuna, na misala na bango. Mpe bakiti na nsé mpenza na lolenge ete batii basi lokola babateli kimia na

balabala. Ezali mpenza nsoni mpo na ekólo nyonso! Iyo, misie. Okosala nini mpo na yango?

<sup>769</sup> “Osalaka nini mpo na yango, Ndeko Branham?” Nasengeli komemia yango, nazali mwana-mboka ya Amerika, nasalaka ndenge mokonzi monene alobaka. Soki ata na...Soki libota moko ebungisi limemia na yango mpo na libota (bana babungisi limemia mpo na baboti), libota wana esili na yango kopanzana. Soki lo—losambo moko etikali bungisa limemia mpo na mokengeli na yango, ee, losambo wana esili na yango. Mpe soki ekólo moko etikali kobungisi limemia na bango mpo na Cour Suprême mpe mikano na yango, ekólo yango esili kopanzana. Ezali mpenza ya solo. Tosengeli komemia makambo yango, mpo bango nde mokonzi monene, bomoni. Kasi ezali malamu te, mpo na kobanda. Ata moke te!

<sup>770</sup> Boyebaki ete mobali, na Biblia...na Genese, mokapo ya 1, ntango Nzambe akeláki mwasi ná—ná mobali, bongo asálaki mobali ná mwasi, Nzambe ayebisaki Eva ete “Mobali na yo akokonza yo, akozala mokonzi na yo”? Loba yango na Amerika, okomona epai okokómá! Oh, ezali bongo te, mwasi nde akonzaka mobali; basengeli kosala bongo, bisika bato nyonso basalaka esili kobongisama...

<sup>771</sup> Nakoki kobengisa basi, soki nasengelaki kosala yango, oyo bayaki na biró na ngai kuna, ntuku na ntuku, basi malamu mpenza....Nalobi te ete basi nyonso basengeli kosala te, na ntango moko boye; ntango mosusu azali na mobali oyo azali na bokono to eloko moko, mpe basengeli kosala. Kasi soki batindami na makasi te, basengelaki kosala yango te. Esika na bango ezali na ndako, na mwa château na bango, kuna nde epai basengeli mpenza kozala.

<sup>772</sup> Mpe basi na biso ya Amerika basilá kozuá litómba ya kozua bonsómi to kokufa. Ata epai ya banyama nyonso mpe bongo na bongo, soki likambo yango élóngi, esalemaka mpe ekitisaka libota lokumu na yango mobimba.

<sup>773</sup> Mwa ndeke moko ezalaka na Afrika, ezali mwa ndeke oyo pic.

<sup>774</sup> Sikawa, na momesano, nyama ya mwasi nde ezalaka ntango nyonso elongi mabé koleka na bango mibale. Mobali azalaka ntango nyonso kitoko koleka, cerf ya mobali, wapiti ya mobali, faisán ya mobali, so—soso ya mobali, mpe elekaka ntango nyonso....Mpo ndeke ya mwasi etikalaka na ndako. Etikalaka na zála, ebókolaka bana. Emíbombaka soki emoni kokómbele, nyoka, mbwa ya zamba, to soko eloko nini mosusu, bomoni, mpo na kobókola bana na yango.

<sup>775</sup> Kasi na libota oyo e...to epai oyo—oyo—oyo mwasi, to nyama ya mwasi, nde eleki na kitoko, etalisaka ntango nyonso kokweya. Na Afrika, soki ozui ndeke moko....Ezalaka na mwa ndeke moko kuna, mpe ezali bobele moko, na ba-continent, oyo

ngai nayebi, ya mwasi nde eleki oyo ya mobali na kitoko. Mpe, na bongo... Nde—ndeke yango esalaka kindumba ntango nyonso. Ekendeke bipai na bipai mpo na koluka mobali, mpe ekendeke kobota máki nsima na kosangana ná ye, mpe etiki mobali yango éfandela maki yango wana ye akei koluka mobali mosusu. Ezali mpenza solo. Bomoni? Bomoni nini nalingi koloba?

<sup>776</sup> Na, sikawa bótala, na Amerika lelo, basi na biso. Elenge mobali moko ya Kentucky ayebisaki ngai, eleki mwa mikolo, ete basi nkama mwambe bazalaki kosala na kompani moko, awa na Kentucky. Alobaki: "Nakoki kolápá ndai, kozanga komikosa, ete nkama minei kati na bango bazali mpenza bandúmba ya balabala, kasi babálá, mpe bazali na bana." Mobali moko abimisaki mwasi na ye kuna mpe abétaki ye na libaya, na nsima alingaki koboma ye. Mosusu akendeki kobeta mobali moko masasi. Mosusu azokisaki mpe abundaki. Esengelaki kosalema te. Ezali malamu te.

<sup>777</sup> Bózongisa mwasi na makusa, na esika na ye, na nsima, nyonso ekotambola malamu. Kasi bobimisi ye nde na misala ya letá, esili mpo na ye. Ya sol-... Nalobi te ete...

<sup>778</sup> Basi ya Amerika basekaka na lolendo, wana batomboli zólo likoló, mpe balobaka: "Likambo Yango ezali na ntina moko te." Mpe: "Lakisa ngai." Na ntembe te, bosengeli kosala bongo, mpo Biblia esilá koloba ete bokosala bongo. Bosengeli kosala bongo.

<sup>779</sup> Mpe awa, ntango... Kalakala mpenza, eleki ntango molai, na lingomba Metodiste, soki mwasi akáti nsuki na ye, bazalaki kobengana ye na lingomba. Na ntembe te, bazalaki kosala bongo. Iyo, ya solo mpenza. Ba-Nazaréen, ba-Pélérin de la Saintté, ba-Pantekotiste, bango nyonso bazaláká kosala bongo. Likambo nini esalemaki?

<sup>780</sup> Boyebi mpo na nini? Botii ba-bílemba na eteyelo. Ezali mpenza ya solo. Moto moko oyo abangaka ete madesu ya bana... abangaka ete bóbengana ye, bóbwaka ye libanda na lingomba. Bazangaki mpenza mpiko ya kotelema, kotelema ngwi na Liloba na Nzambe, Ésala mpasi to soko Ésala mpasi te. Ezali mpenza ya solo.

<sup>781</sup> Bóyoka malamu, mobali azali mokonzi. Kokanisa te ete yo moto okokonza ndako. Ozali mokonzi ya ndako te. Ozali mpenza... Sikawa, ozali moómbo te, kasi ozali mosungi. Mpe Adama... Mobali nde azalaka na bokonzi likoló ya mwasi na ye, mpe bobele ye nde azali na mokumba ya mwasi na ye. Nzambe asambisaka mobali mpo na mwasi na ye. Sikawa, bótángá mpe bótala soki Nzambe alobi bongo, sikawa.

*Mpo mobali asengeli kozipa motó te, mpo ete ye azali  
na élicingi mpe na nkembo ya Nzambe...*

<sup>782</sup> Nzambe azali mwasi te, Nzambe azali Mobali. Boyebi, ntango bakómisaka ngondo Maria mpe nyonso wana, mpe balobel-... to kolobelá bato mpe nyonso ndenge wana, mpe

babóndelaka ngondo Maria, boyebi soki ekaniselaka ngai nini? Nzambe-mwasi monene Diana, oyo Polo apámelaki mpe abenganaki. Ya solo. Alobaki: “Ee, Nzambe azali mwasi te!”

<sup>783</sup> Libanga moko ekweyaki na elanga, mpe balobaki ete nzambe-mwasi nde akitisaki ekeko na ye, yango nde ntina mwasi na Kolinti, mpe na etúka wana, ba... oyo bazalaki kosambela Diana, balingaki kokóma batei.

<sup>784</sup> Balobaki: “Ee, molimo eyebisi biso ete tokoki koteya.”

<sup>785</sup> Alobaki: “Nini? Liloba na Nzambe eutaki nde epai na bino, mpe eutaki bobele epai na bino? Soki moto akanisi ete azali moto ya molimo to mosakoli, áyeba ete oyo nalobi ezali mitíndo ya Nkolo: tika ete mwasi áfanda kimia mpe ázala na botosi kati na lingomba, áteya to ázala na bokonzi moko te.” Ezali mpenza bongo! Yango nde oyo Makomi elobi. Bomoni? Mpe Nzambe akosambisa batei mingi mpo na yango, na Mokolo ya Kosambisama.

<sup>786</sup> Ee, bóyoka! Okoloba: “Ee, nayebisi yo, ngai batéyá ngai bongo.” Sikawa oyebi yango malamu koleka! Ya solo. Soki yo to moto moko alingi komela mwa nkisi, bongo moto moko ayebisi yo ete ezali mbondo, kasi yo—kasi yo oboi mpe omeli yango kaka, ezali fótí na yo moko, nsima na yango. Bomoni?

<sup>787</sup> Sikawa bóyoka oyo:

*Mpo mobali auti na mwasi te; kasi mwasi auti na mobali.*

*Yango ntina ete mwasi asengeli kozala na elembo ya bokonzi na motó na ye mpo na banje.*

<sup>788</sup> Moto moko kati na bino azali kotánga yango? Bakolinti ya Liboso, mokapo ya 11, molongo ya 10. Soki botali malamu, “elembo ya bokonzi” (Mpo na nini?) “mpo na banje,” Bakolinti ya Liboso, mpo banje ezali moto, motindami. Bótala, ezali lisusu “m” ya moke. Epai oyo balobelí Banje, Banje ya Likoló, ezali “M” ya monene, “M” ya monene. Epai oyo ezali “m” ya moke, ezali banje oyo bazali bato.

*Nde kati na Nkolo, mobali azali wana te...to mwasi,...to mwasi azali te kozanga mobali—mobali.*

*Mpo lokola mwasi auti na mobali, ndenge moko mpe mobali ayei na nzela na mwasi;...biloko nyonso biuti na Nzambe.*

*Bino moko...bókata: ebongi nde ete mwasi ábondelaka Nzambe (ná nsuki mikuse) kozanga kozipa motó? (bókanisa naino, sikawa)*

<sup>789</sup> Sikawa bótala malamu:

*Ndenge biloko esálámá ezali nde koteya bino te, ete, soki mobali azali na nsuki milai,...*

<sup>790</sup> Okoloba: “Elobeli nini?” Nsuki. Bozali komona oyo Polo azali kolobelba te? Nsuki, nsuki milai! Soki... Mwasi asengeli kozala na nsuki milai. molongo ya 14 sikawa:

*Ndenge biloko esálémá, ezali nde koteya bino te, ete,  
soki mobali azali na nsuki milai, ezali nsoni mpo na ye?*

<sup>791</sup> Bososoli yango? Ezali nsoni mpo na mobali kozala na nsuki milai, kasi mpo na mwas...ezali esika ya mwasi. Nzambe asalaki mobali na kokesene ná mwasi, na sexe, na kotala boye, mpe na makambo nyonso mosusu. Mwasi asengeli te kolata elamba... Biblia elobi ete “soki mwasi alati pantalon to elamba moko ya mobali, ezali mbindo, salité mpe bosoto na miso ya Nzambe.” Mpe Nzambe akosala ete áfuta mpo na yango. Bokoyokela nani? Kasi oyo ezali Biblia!

<sup>792</sup> Bokendeke bipai na bipai mpe bolobaka: “Ee, ngai namoni ete ezali kitoko mpo na... komona basi baláti pantalon.” Kasi Nzambe akelaki bango na bokeseni, Alingi ete bálata na bokeseni.

<sup>793</sup> Mpe Biblia elobi: “Soki mwasi alati ata elamba oyo ezali mpo na mobali, ezali mbindo.” Boyebi *mbindo* ezali nini? Ezali “eloko oyo ezali na bosoto na miso ya Nzambe.” Mpe Jehovah Monene Oyo akitisaka miso likoló na yo lokola eloko ya bosoto... Mpe Biblia elobi...

<sup>794</sup> Bongo bino baoyo bolobaka... Basi mosusu kati na bino sikawa, mpo na bilenge bana na bino ya basi, ya mibu zomi na mwambe, ntuku mibale, kotikáká bango ete bábima awa balati bongo!

<sup>795</sup> Ná yo mpe, mama! Bomoni? Ntango obimaka ná ba-collant wana mpe bilamba mosusu, mpe obikaka... mpe okendeke na balabala, mpe—mpe olati bilamba oyo bakómí kotonga mikolo oyo, mpe ekomisaka yo lokola eloko oyo ozali te. Bomoni? Mpe obimi kuna na balabala lokola mwasi oyo azali koluka mibali, ntango mosusu osali na yo mabe moko te mpe ozali peto mpo na mobali na yo ná nyonso wana, kasi soki obimi na balabala mpe mobali moko atali yo mpo omitalisi ndenge wana, okweisami, mpe okosámba na Mokolo ya Kosambisama mpo osalaki ekobo ná mibali nyonso oyo batalaki yo ndenge wana. Yango nde oyo Biblia elobi.

<sup>796</sup> Biblia elobi: “Ye oyo akotala mwasi na mposa mabe na ye, asili kosala ná ye ekobo na motema na ye,” mpe okweisami mpe oko...

<sup>797</sup> Ntango okokómá na Esambiselo, mpe okoloba: “Nkolo, Oyebi motema na ngai; natikálá kosala ekobo te, nabikaki sémbo epai na mobali na ngai.”

<sup>798</sup> Kasi mobali moko akoya wana, mosusu akoya wana, mosusu akoya wana, mosusu, mosusu, zomi na mitano, ntuku mibale,

ntuku misato, mibali ntuku minei bakotelema wana, bakoloba: “Okwei na ekobo!” Mpo na nini? Mibali mosusu batalaki yo.

<sup>799</sup> “Ee, nazalaki na ntina na yango ata moke te.” Ee, mpo na nini omitalisaki ndenge wana? Na ntango oyo Nzambe ayebisaki yo ete ólata yango te, ete kosala bongo ezalaki mbindo, mpe obandaki koyoka *Nani Alingaka Suzie*, to nini kútú . . .

<sup>800</sup> Bomonaki likambo oyo ekómelaki mobali ya *Nani Alingaka Suzie*? Bino nyonso bomonaki yango, kala mingi te, na zulunále. Ntango tozalaki na Casper, na Wyoming, nde ebimaki. Mpe nkombo na ye nani? Mobali oyo . . . na émission *Tolingaka Suzie*, to ezalaki—ezalaki mpenza nini? Mo . . . Oh, oyo mokolo ya misato na mpokwa, botikalaka na ndako mpe bozangaka koya na liyangani ya mabondeli mpo na kotala yango. Ezali kútú nini? *Tolingaka* . . . Nkombo na yango nini? [Ndeko mwasi moko alobi: “*Nalingaka Lucy*.”—Mok.] *Nalingaka Lucy*, mobali na ye, esengeli kozala, azali kosala nyonso, bakangaki ye kuna na Reno, na Nevada, ná elenge mwasi moko ya moindo, oyo abikaka ná ye, mibu ebele. Nde oyo botikalaka na ndako mpo na kotala yango, na esika ya kokende koyoka Nsango-malamu. Mwasi yango nde ayámbolaki yango. Oh, mawa! Eloko moko ya peto ezali te, libanda na Yesu Klisto!

<sup>801</sup> Pambolama, ndeko, na—nakoyebisa yo—yo moninga, mwa . . . Okoloba: “Oh la la, tala eteyelo kitoko oyo.” Bingondo ya—ya mabe koleka oyo tozali na yango, oyo eliaka bipola, ezali bandeke kitoko. Okoki kosósola ndeke na nsálá na yango te, bomoni. Boye bóbosana yango te. Oh, la la!

<sup>802</sup> Sikawa bótala malamu:

Ndenge mokili esalémá . . . (wana ezali molongo wana ya 14) . . . ezali nde koteaya bino te, ete ezali nsoni mpo na mobali kozala na nsuki milai? (Wána ezali nde mpo na mwasi.)

*Kasi soki mwasi azali na nsuki milai, ezali nkembo mpo na ye: . . .*

<sup>803</sup> Sikawa, azali kolobela nini? Ekoti oyo bino ba-Katoliko bolátáka na kati ya ndako-a-nzambe? Te mpenza! Mwa kitambala likoló ya motó na yo, ná muswále? Azali nde kolobela nsuki na yo!

<sup>804</sup> Sikawa! Mpe soki mwasi akati nsuki na ye, akati nkembo na ye, mpe azali na ndingisa ya kobondela na etumbelo te. Bomoni, kaka ndenge elobami awa: “Ebongi nde ete mwasi ákende kobondela kozanga kozipa motó?” Alobi awa, alobi: “Ee, asengeli kokata nsuki na ye.” Boye, ákókola motó mobimba kasi. “Mpe soki akókoli motó mobimba,” alobaki, “ezali kokitisa lokumu, ezali nsóni mpo na mwasi, kosala bongo.” Na nsima alobi: “Asengelaki kozipama.” Sikawa, nazali kaka—nazali kaka kotángá mokanda ya Polo. Bino nyonso, etali bino, bomoni.

*Kasi soki mwasi azali na nsuki milai, ezali nkembo  
mpo na ye: mpo nsuki na ye epesameli ye mpo na ezipeli.*

<sup>805</sup> Elobi ete ekoti nde ekopesamela ye? Bino ba-Katoliko to bino ba-Protestant, bamoko to bamosusu, baoyo bakendeke na losambo mpe balingaka kolata ekoti, bokoloba: “Ee, nakokende na losambo, nasengeli kolata ekoti.” Te, osengeli nde kotika nsuki na yo ékola. Yango nde bokeseni. Bomoni?

*... mpo nsuki na ye epesameli ye mpo na ezipeli.  
(Mpe ezali nsoni mpo na ye, kokóta na losambo kozanga  
kozipama, kokende kobondela na etumbelo.)*

*Nzokande, soki moto moko amonani lokola nde  
azali—azali... (Nandimi te ete nakoki kotánga liloba  
yango, ko-te-le-me-l-...) ... Kotelemela—kotelemela  
(boyebi oyo kotelemela ezali), biso tozali na ezaleli ya  
lolenge wana te, Lingomba ya Nzambe mpe ezali na  
yango te.*

<sup>806</sup> Sikawa soki olingi kowelana na ntina na yango, wélána ná Yango. Malamu, soki olingi kotelemela na ntina na yango: “Oh, ekosala eloko te. Tótika bango básala na bango. Ee, nakanisi ete ezali eloko moko te. Ngai... Ata bongo, ezali likambo ya nsuki te, ezali nde likambo ya motema.” Ezali solo; soki motema ezali ndenge esengeli, nsuki mpe ekozala ndenge esengeli (Ah-ha).

<sup>807</sup> Sala na yo, soki olingi kotelemela, Polo alobaki: “Biso tozali na ezaleli ya ndenge wana te, Lingomba ya Nzambe mpe ezalaka na yango te” Alobaki: “Soki olingi kozala na ngámbo ya Kaina, ee, kende liboso.” Kasi Oyo ezali likambo oyo Polo azalaki koloba.

<sup>808</sup> Oh, mpe nalingi koseka te, mpo ezali likambo ya koseka te. Kasi nayebisi bino baninga, ezali nsoni komona ndenge makambo oyo epesami ndingisa ya kosalema. Ngai...

<sup>809</sup> Bóyoka! Mpo na bino, balingami bandeko na ngai ya basi, nalingaka ete bóbongisa nzoto na bino malamu mpenza mpe bómónana kitoko mingi, yango nde oyo bosengeli kozala. Yango nde oyo bosengeli kozala. Mpe bosengeli kozala na bopolo mpe peto mpenza, ná nyonso wana, ntango mobali na yo ákómaka, lokola ntango azalaki naino chéri na yo. Osengeli kokutana na ye na ekuke mpe ko—mpe kopwepwa ye na bopolo mpenza, ndenge esalemaki mokolo opwepwaki ye na etumbelo mpo ákómá mobali na yo. Ya solo. Nakopamela yo te mpo obongisi nzoto na yo malamu mpenza mpe omonani kitoko mingi. Mpe nalingaka ete bázala ndenge wana, Nzambe ayebi ete ezali bongo.

<sup>810</sup> Eleki mwa ntango awa, nazalaki kosolola ná Jack Shuler. Nani asílá koyoka na ntina na Jack Shuler? Motei ya lokumu koleka, oyo ba-Metodiste bazali na ye. Alobaki: “Mwasi moko ayaki mpe alobaki... nsuki na ye bosoto, azoliáká bazoká, ná

bilamba na ye ezipa nzoto malamu te, alobaki: ‘Oyebi, mobali na ngai akokaka lisusu koyikela ngai mpiko te.’”

<sup>811</sup> Ye alobaki: “Napesi ye fóti te.”

<sup>812</sup> Ya solo. Kasi eloko oyo osengeli kosala sikawa, osengeli kosala yango na ndenge esengeli. Kobongisa nzoto na yo mpe kitoko na yo uta na makambo ya Hollywood te, zua yango uta na Biblia, liboso na Nzambe. Zalá mpenza mwasi, sálá makambo lokola mwasi mpenza, látá bilamba lokola mwasi mpenza, zalá peto. Sálá makambo lokola mwasi mpenza, kolata te ba . . .

<sup>813</sup> Mobali nyonso oyo atikaka mwasi na ye ábima mpe álata biloko ya mike wana liboso na mibali, ná mwa biloko mike mike wana . . . ábima libanda mpo na kokata matíti, mpe kosála makambo ya ndenge wana, mesie, nazoyebisa yo, ndeko! Nalingi te—nalingi kozala moto mabe te, na . . . Nzambe ayebi ete ezali kouta na motema na ngai. Kasi nasengeli ko . . . Nakosengela kobóngwana mingi, liboso nátika oyo ya ngai ásala bongo. Nakozala mokonzi kuna likoló na ngomba, na ntango nyonso oyo nakokoka, bomoni; mpe ntango nakokoka lisusu te, nakolongwa kuna. Ya solo.

<sup>814</sup> Oh, ndeko, ezali nsóni mpe kozanga lokumu mpo na basi kosala bongo. Mpe na—nalingi koloba te, ndeko mwasi . . . Na—nazosámbwisa yo te, nazali bobele koluka koloba . . . Losambo na biso oyo ezalaka na bandimi oyo bakomisá nkombo te, bato bayaka kaka koya awa. Kasi oyo ezali ndako ya Nzambe, mpe toyebisaka mpenza na bato ete bálataka biloko wana te. Ete ezali . . . okosamba mpo na yango na Mokolo ya Kosambisama. Sikawa tálá malamu. Tika nsuki na yo ékola, bomoni, mpe zalá mpenza mwasi.

<sup>815</sup> Sikawa:

*Wana nazali kopesa malako oyo . . . nazali kokumisa bino te, mpo boyánganaka mpo na . . . mpo na kokómá malamu koleka te, kasi mpo na kokómá mabe koleka.*

*Mpo liboso na nyonso, ntango bino boyánganaka na losambo, nayoki ete bokabwani ezali katikati na bino; mpe bongo na bongo, . . . (ekobi sikawa kino na mesa ya elámbo)*

<sup>816</sup> Sikawa bójoka Yango. Yango nde ntina oyo banje . . .

<sup>817</sup> Sikawa, Ndeko Palmer, nazali koloba na yo te, na bande oyo, ete óteya ndenge moko kuna, ndenge ngai nazali koteya awa. Kasi oyebi malamu mpe malamu mpenza, mpe yo lokola ozali motei, oyebi ete ezali Solo, ndeko. Malamu.

<sup>818</sup> Boye, *banje* oyo awa bazali “bato”. Soki otali yango malamu, Ndeko Palmer, ekomami na nkoma ya mike, “*banje*”. Mpe Biblia ekobi koloba . . . Azali kolobelá mobali ná mwasi na ye, bomoni, yango nde ntina ya likambo.

<sup>819</sup> Lolenge wana nde bato bakómaka na mobulu mingi na Biblia, balobaka: “Ee, Nzambe alobi likambo moko *awa*, mpe mosusu . . .” Te, yo nde—yo nde obimi libanda ya likambo. Kangáma kaka na likambo yango moko, esili. Azali kolobelá mobali ná mwasi.

<sup>820</sup> Sikawa likambo mosusu moko oyo nalingi kolobelá liboso tósilisa, ekozua ngai pene na miníti mibale:

#### **74. Basantu bakoza la wapi nsima na bokonzi ya mibu nkoto? Mpe bakoza la na nzoto ya ndenge nini?**

<sup>821</sup> Nakanisi ezali motuna oyo eleki kitoko, nalingaka yango mingi. Sikawa tókota na yango mbala moko mpenza.

<sup>822</sup> Na ebandeli, Nzambe . . . Tokozónga na malakisi na biso ya Baebele, mpo na miníti moke. Nzambe azaláki Liziba monene mpenza ya lángi nsambo wana. Bato boni bayebi yango? Bomoni? Mpe bato boni bayebi ete Nzambe azali na Milimo nsambo? Na ntembe te, Milimo nsambo. Mpe Mwana-mpate azalaki na miso nsambo, mpe bongo na bongo, nyonso wana esangani sikawa. Bomoni? Sikawa, wana ezalaki Nzambe.

<sup>823</sup> Sikawa ntango Ye (Logos) ebimaki na Nzambe, elingi koloba Nzambe koutáká na liziba bobele moko wana ya monene mpe akotaki na nzoto moko na lolenge ya—ya moto; mpe yango nde esalaki Logos, oyo tobéngaka theophanie.

<sup>824</sup> Sikawa, soki ozui theophanie mpe ntango ozotala yango, ezali moto. Sikawa lokola to . . . Sikawa, kuna nde esika oyo tozalaki na ebandeli. Sikawa, bozali kosósola yango te sikawa, kasi bozalaki kuna na ebandeli lolenge wana. Ntango moto asalaki . . . Ntango Nzambe asalaki moto na elílíngí na Ye, Asalaki ye theophanie. Mpe Atiáki ye kaka kati na nzoto . . . Ntango Nzambe asálaki moto na elílíngí na Ye, na lolenge na Ye, bazalaki . . . Na Genese 2, ezalaki . . . to Genese 1:28, nabanzi: “Moto azalaki naino te mpo na kobalola mabelé,” mpe Nzambe asilaki kosala mobali mpe mwasi. Ya solo: “Moto moko te mpo na kobalola mabelé.”

<sup>825</sup> Na nsima, Nzambe akitisaki moto mwa moke na nsé, mpe Atiaki ye na kati ya bomoi ya nyama, elingi koloba nzoto oyo, kaka lokola banyama, mpo ákoka kobalola mabelé, ákoka komama. Theophanie wana emamaka te, emónaka te, eyókaka elengi te, eyókaka nsolo te, eyokaka te; biyokeli oyo biso tozalaka na yango. Boye, Nzambe akitisaki moto na nsé mpo—mpo na komama mpe kosimba.

<sup>826</sup> Mpe—mpe wana azalaki kotambola na kati ya elanga ya Edene, liboso lokola theophanie (lokola Molimo Mosanto oyo azali awa sikawa mpe azali kotambola awa), ezalaki kokamba bomoi ya banyama. Ezalaki kokonza nyonso, kasi ekokaki kobalola mabele te, bomoni. Boye, Nzambe atiáki ye na kati ya nzoto mpo ákoka kobalola mabelé. Apesaki ye biyokeli na ye mitano, mpo na kobalola mabele mpe kobongisa bi—bilanga

ya vínio mpe—mpe bongo na bongo, mpe na ntango wana moto azalaki komónana naino lokola ye moko. Oh, ezali elilingi kitoko mpenza.

<sup>827</sup> Bótala, mpo ntango asálemaki liboso, asalemaki bato mibale elongo. Asálemaki mobali mpe mwasi, moto yango. Biblia nde elobi azalaki bongo. Nzambe asalaki moto mbala moko mobali mpe mwasi, “Akelaki ye.” Bótala sikawa, ntango moto akabwanaki na theophanie mpe atiamaki kati na nzoto, azalaki—azalaki mpenza mobimba te; eteni ya ezali na ye ezalaki naino théophanie, boye, ezalaki mpenza ndenge esengelaki te.

<sup>828</sup> Ngombe ya mobali ná ya mwasi elekaki wana, mpunda elekaki, mpe ngombe mobali elekaki, mpe banyama nyonso elekaki, mibale na mibale. Kasi Adama, ye...ezalaki... Bomoni, eloko moko ezalaki kozanga. Mposa ya kozanga wana nde ezalaki kotalisa ete mozalani moko azalaki kozela ye. Bosósoli yango? Mpe makanisi mpenza ete tosengeli kokufa awa, ete tozomítungisa ná komítuna-mituna, mpe ete tozali na mposa makasi ya Bomoi oyo ezangi kufa, elakisaka ete ezali kozela biso. Bomoni?

<sup>829</sup> Mpe Adama azalaki ye moko. Mpe Nzambe, mpo na kolakisa ete bakokaki kokabwana te...Sikawa, nakozongela likambo yango, kala mingi te.

<sup>830</sup> Akendeki kozua mabelé te mpo na kosála Eva, kasi Asálaki ye uta na mabelé oyo ya ebandeli, Adama. Azuaki mokuwa moko na mopanzi na ye mpe Asálelaki ye mosungi, mpe oyo wana ezalaki Eva. Asálemaki mpo na mobali, mpe azali eteni ya mobali. Azalaki eteni na ye na ebandeli, na bokeli, na lolenge ya theophanie. Mwasi azalaki eteni na ye awa, na bokeli oyo. Akokaki kokabwana na bokeli mosusu te, asengelaki kosalema na bokeli moko oyo.

<sup>831</sup> Yango mpenza nde ntina Klisto ná Nzambe basengelaki kozala Moto bobele moko, ekokaki kozala ndenge mosusu te. Soki Ázalaka moto malamu to mosakoli, Alingaki kozala Mosikoli te; Asengelaki kozala Mokeli Ye moko. Kasi Azali naino theophanie sikawa, bomoni, lolenge Azalaki na eleko wana.

<sup>832</sup> Sikawa moto moko ayaki awa mpe a—azalaki malamu mingi; mpe Nzambe alingaki yango, Alobaki: “Ezali kitoko mingi, tika ete bázala na mokili mpe bábika kuna libela. Esili; mpo na—mpo na Seko, kokóba se kokóba se kokóba. Tika ete ékóla, mpe nzete nyonso ébota, mpe makambo nyonso ndenge wana. Mpe tika ete moto ázala na bomoi, mpe banyama bázala na bomoi, ná makambo nyonso mosusu, libela na libela. Ezali malamu mingi.” Bomoni?

<sup>833</sup> Na nsima, lisumu ekotaki. Mpe nalingi koloba likambo oyo. Kati na...Bato mingi basalaka libunga ya ndenge wana na Likomi moko oyo, mpe ezali na Nzembo ya 23. Batángaka Yango boye: “Iyo, ata natamboli na lobwaku ya molili ya elilingi ya

kufa.” Sikawa, eloko ya ndenge wana ezalaka te. Biblia elobi te ete: “Elílíngí ya molili ya lobwaku...lobwaku ya molili ya bililingi ya kufa.”

<sup>834</sup> Elobi: “Ata natamboli na lobwaku ya molili na kufa.” Sikawa, liboso ékoka kokómá elílíngí, esengeli kozala na pole mpo na kosala elilíngí. Bomoni, Dawidi lokola azalaki mosakoli mpe na nsé ya epakweli, asalaki libunga te, alobaki bobele Solo: “Iyo, ata na...” ezali te, natamboli na lobwaku ya *molili*, kasi, “na lobwaku ya *bililingi* ya kufa.”

<sup>835</sup> Na bongo osengeli kozala na eteni na mokama moko boye ya pole, mpo na kosala elilíngí. Mpe lolenge wana nde yango ezalaka awa. Tozali nzoto ya mosuni mpe ya molimo. Nzoto oyo esengeli kokufa, mpe ebotamaki na nzela na mwasi; na nzela na eloko mosusu te, bobele kati na... Na Nzambe te, bozali mbuma ya kobotana uta na Adama ná Eva. Ózala moindo, mondele, to ózala soko nini, ozali mbuma ya kobotana, mokitani ya Adama ná Eva. Yango nde esali ete nzoto na yo “ebotami kati na lisumu, esalemi na lisumu na nko, eyei na mokili ná lokuta na monoko.” Osili kobunga mpe lokweisama na ebandeli ya bomoi na yo, ozali atá na libaku malamu moko te.

<sup>836</sup> Sikawa, mpo molimo oyo ozali na yango, eyei epai na yo na nzela ya lizalisami, mpe na lizalisami eyei na nzela na koyebana na nzoto, na mposa ya mobali ná mwasi, yango nde ebótaka mwana ya mokili oyo. Soki mwana yango atikali ye moko, mpe balakisi ye nzela ya malamu te, akolanda nzela ya mabe. Soki balakisi ye malamu to mabe te, akolanda nzela ya mabe. Mpo kosala bongo ezali lolenge na ye.

<sup>837</sup> Tala malamu mwa bebé moko, aleki ata molai *boye te*, ásilika kaka; ako...a—akomikámola maboko, elongi na ye ekómi motane, mpe akangi mpéma. Ya solo. Ezali nini? Ezali lolenge na ye. Azui yango uta na papa na ye to na mama na ye, moko na bango; azalaki na nkanda ya kokoka mpenza mpo na kobundisa kutut mosumani oyo bakatelaka ba-nzete. Soki bango te, nkóko na ye ya mobali to ya mwasi. Bomoni, azali mokitani na bango.

<sup>838</sup> Boye, yango nde esalaka... Obotami na mokili. Oyaki awa na lolenge ya mokili, mpe bomoto na yo mobimba ezali moindo mpe na bosoto, mpe ekweisami, elakami mabe mpe ezali kokende na lifelo. Ya solo!

<sup>839</sup> Kasi ntango obotami mbala ya mibale, na bongo Pole ya Nzambe engengi uta na likoló kino na elimi yango (aleluya), na bongo ezali lisusu lobwaku ya molili te, kasi ekómi lobwaku oyo ezali na elilingi na kati na yango. Okoki kozipama awa, na nzoto, ná makambo ndenge na ndenge oyo ezipaka biso miso, kasi na kati, Pole esilá kokoka. Mokolo moko Pole ná molili wana esengeli kokabwana! Mpe ntango pole engengaka, molili ekímaka. Mpe ntango tokendeke mpo na kozala elongo na Klisto,

na nzoto wana, molili ná kufa elimwaka, mpe tokótaka mbala moko na kati ya Pole oyo ebongi be. Nkembo na Nzambe! Tala biso oyo; bokono ezali lisusu te, molili ekosangana ná yango lisusu te.

<sup>840</sup> Sikawa tozali na bokono ná esengo, mpe tozali na bokolongo ná makasi, mpe tozali na makambo ya *kati* ná ya *libanda*, ná *bamátá* mpe *kitá*, esengo mpe mawa, nyonso wana. Ee, ezali na yango kaka elilíngí. Tozali na pole ekoki mpo na koyeba ete Pole ezali kuna; mpe tozali naino kati na nzoto, na mosuni. Kasi mokolo moko, Ntongo ekotána. Na ntango wana nde mwanje ya liwa akozala na lokolo ya mbeto, na ntango wana nde monganga akoloba ete nyonso esili; mpe lolenge ya mokili oyo ekokabwana ná oyo ya molimo, mpe pole ekopumbwa mpo na kozonga na Pole, mpe molili ekozonga na molili. Bongo oyo ekúfaka ekoláta oyo ekúfaka te. Na ntango wana nde oyo epolaka ekoláta oyo epolaka te. Na ntango wana nde oyo ekúfaka ekoláta oyo ekúfaka te, mpe tokobongwana longwa na ekelamo ya ntango kino na ekelamo ya Seko. Okoki kobima kuna te ná molilí nyonso, osengeli kozala na pole na kati ya molilí. Yango mpenza. Yango nde nzoto oyo okozua.

<sup>841</sup> Tosalaka nini? Ee, ndeko na ngai molingami mosanto, ndeko na ngai molingami ya mwasi mosanto, liboso na kozalisama ya mokili, ntango Nzambe akelaki yo na elilingi na Ye, to ntango akelaki mo—moto na elilíngí na Ye, mpe akelaki mwasi na elilingi ya mobali mpo na nkembo ya mobali, Asalaki yo theophanie. Lokola Ye moko mpenza, ntango Alobaki “tika Tó” na bikelamo oyo Asilaki kosala, “tika ete Tósala moto na elilíngí na Biso Moko, na lolenge na Biso, theophanie.” Nzambe akomaki naino mosuni ata moke te, Azalaki kati na théophanie.

<sup>842</sup> Mpe Mose amonaki Ye. Mose agágaki: “Nkolo, tika námona Yo.”

<sup>843</sup> Alobaki: “Kende kuna mpe mibómبا na kati ya libanga, kati na libulú.” Mpe Mose azóngaki kati na libulu yango; mpe ntango Nzambe alekaki wana, mikalikali mpe nkake . . . Ntango Nzambe alekaki, Abalolaki mokongo na Ye *boye*.

Mpe Mose alobaki: “Ezalaki mokongo ya Moto.” Aleluya!

<sup>844</sup> Ezalaki Nani? Melekisedeke oyo akitáki, Mokonzi ya Saleme, ná tata to mama te, na ebandeli ya mikolo to nsuka ya bomoi te. Ezali Ye! Mpe Akitaki. Wana nde Moto oyo asololaki na Abraham; oyo Amisangiselaki mwa nzoto moko ya mosuni ndenge wana, mpe “Fiuu!” afulaki mpema kati na yango, akotaki kati na yango, akitaki mpe aliaki mosuni ya mwana ngombe, amelaki miliki ya ngombe, aliaki mwa mantéka ná mwa lipa ya masángu. Ná Banje mibale wana.

<sup>845</sup> Ntango bakendeki kuna, ná makambo nyonso wana, “Fiuu!” elimwaki mpe ezalaki lisusu te.

<sup>846</sup> Natikálá kokanisa yango te. Kala mingi te awa, nazalaki kotondisa lisasi ya bondóki, nazalaki na carabine .22, ezali .220 Swift. Bino bandeko oyo bobétaka masasi, oyo bozali awa, boyebi yango. Mwa lisasi yango, ezali lisasi ya mbuma ntuku minei na mwambe, ya molai lokola *boye*, lisasi .22 oyo toyebi. Etendaka pene na nguya ya ebombelo masasi ya .30-06. Sikawa na...na esika basalaka yango, batóndisaka yango kaka mpo na metre nkótó na nkama misato na ntuku misato na seconde moko. Malamu, kasi okoki kotinda yango kino na metre nkótó na nkama mitano na seconde moko. Mpe—mpe, na elobelí mosusu, soki tozalaki kobeta... Tozalaki kobeta, mokolo moko, na metre nkama mibale, mpe lisasi ezalaki kobeta putulu, ezalaki kopumbwa liboso makelele ya bondóki etikala koyokana. Nde ndenge mbangu yango ezali.

<sup>847</sup> Na bongo, soki ozui cure-dent (boyebi, ngámbo oyo efináná na cure-dent) zindisa yango na putulu, mpe tondisa eloko yango na putulu, mwa mbuma soki minei to mitano mpamba, mpe tia yango na likoló kuna, na nsima kotisa lisasi. Telema awa, mpe na seconde moko, ozui lisasi moko na loboko. Mpe béta lisasi yango na eloko ya kobeta, oyo ezali na metre ntuku motoba mosika na yo, mpe eloko yango ekoningana kutu ata moke te. Lisasi ezongi na lolenge na yango ya ebandeli, kozonga na ba-gaz. Tálá lisasi oyo basali na cuivre elongo ná plomb, mpe seconde moko ekokoka te, ezongi, mpe ekomonana lisusu te. Ezongi ndenge ezalaki, eleki mibu kiasa na kiasa, ezongi na bagaz. Ba-gaz yango esengeli kosalema mpe kokómá lisusu cuivre ná plomb, mpe bongo na bongo, ndenge wana. Ba-gaz yango esengeli kofanda.

<sup>848</sup> Sikawa, ezali yango mpenza. Lolenge wana nde tozali awa, toútá na ezali moko ya likoló koleka. Na ebandeli, tozalaki na elilingi ya Nzambe. Ezipelo ná molili nde esalaka ete tóyeba yango te sikawa. Kasi Yesu ayebisaki bayekoli na Ye ete Ye “azalaki elongo na bango liboso na kozalisama ya mokili”. Bomoni? Tozalaki! Bokoki koyeba yango te sikawa, kasi bozalaki na ebandeli. “Mpe soki mongombo oyo ya mabele ebebi, tozali na mosusu oyo ezali kozela!” Aleluya! Na nsima, tokokota na théophanie oyo, epai oyo tozaláká kobika kala, na bongo tokokoka kolia mpe kopesana mbote ya loboko. Mpe milimo oyo ezali na nsé ya etumbelo ezali kobéléla: “Kino ntango nini, Nkolo?”

<sup>849</sup> Bibuteli ezali nsambo oyo ekendeke epai na Nzambe, mpo na Milimo nsambo, wana—wana Ezali kokita. Malamu, wana ozali kokende na nsé ya etumbelo ya Nzambe, bazalaki kobéléla: “Nkolo, kino ntango nini? Tokoki kozonga, longwa awa?”

<sup>850</sup> Nzambe alobaki: “Etikali kaka ntango moke, kino ntango baninga na bino bakonyokwama lokola bino.” Bomoni?

<sup>851</sup> Na nsima, milimo ekozonga, mpe bakokóma lisusu mibali mpe basi, mpe bakobika mpo na libela, ntango molili nyonso, ná kufa, ná bokono ná mawa ya molili esili kolimwa; elilingi ekozala lisusu te, ekotikala bobele pole ya moi!

<sup>852</sup> Bóyoka. Ezalaka boye. Bótika yango éyinda ndenge elingi; molili ekoki kokóma molili koleka te, kino moi ekonyata molili nyonso mpenza. Molili ná pole ekoki koumela ntango molai esika moko te. Mpamba te... Nini eleki na nguya? Ezali pole. Mpe ntango pole engengi, molili ekímaka. Amen. Bozali na esengo te? Bozali na esengo te ete boyebi yango? Ntembe ezali te, ezali ata na elílíngí moko te esika moko. Kasi Pole oyo epambolami, oyo ezali na mitema na biso sika-sikawa, eloko oyo ezali kotatola: Mwana na Nzambe, nguya na Nzambe.

<sup>853</sup> Mpe tokótaka awa, tomonaka nguya ya Molimo Mosanto kokita mpe kokóta na liyangani, mpe koloba: "Ozalaki Mme *Songolo-pakala*, osalaki likambo *boye*, na esika *boye*. Osili kotungisama na likambo oyo ngonga *boye*, kasi YANGO ELOBI NKOLO: 'Téléma, obiki.'" Mpe ebosono ná mokufi miso batelemi. Mpe moto akomi mikuwa mpenza, cancer esili kolia ye nzoto mobimba, azongi na bomoi ya sika mpe na nzoto kólóngónó.

<sup>854</sup> Ntembe ezali te, Yesu alobaki: "Makambo oyo Nazali kosala, bino mpe bokosala yango." Mpe Alobaki: "Nasalaka eloko moko te, kino Tata álakisa Ngai yango."

<sup>855</sup> Ezali nini? Ezali Pole oyo eyaki kosangana ná molili oyo, bomoni, mpo na kosikola biso. Bosósoli oyo nalingi koloba?

<sup>856</sup> Sikawa, mokolo moko, ekozonga semba kuna, na bongo ntango theophanie ekokóma lisusu nzoto oyo ekufaka te, ndenge ezalaki na ebandeli, na bongo Yesu akoya, mpe Nzambe... ntango Klisto akozala moko. Klisto akofanda na Ngwende, mpe bato nyonso bakozala bato mpenza. Klisto akozala na ngwende ya Dawidi, Moto, Nkolo Yesu; mpo na kokufa ata moke te. Tokokuфа lisusu te, tokobéla maláli lisusu te, tokozala lisusu na mawa te, mpe tokobika mibu nkoto mobimba.

<sup>857</sup> Mpe ntango mibu nkoto yango ekosila na mokili oyo, na nsima zabolo akoya; mpe lisekwa ya mibale ekosalema, lisekwa ya bato bazangi sembo. Bakosangisa limpinga monene lokola zelo ya mbu, mpe bakoya kozingela moláko ya basántu, na ntango yango, Nzambe akonokisa mbula ya móto mpe sufulu uta na likoló mpo na koboma bango.

<sup>858</sup> Mpe Yoane alobaki: "Namonaki likoló ya sika mpe mabelé ya sika, mpamba te likoló ya liboso mpe mabelé ya liboso esilaki koleka, mpe mbu ezalaki lisusu te. Mpe ngai, Yoane, namonaki Engumba Mosanto, Yelusaleme ya Sika, kokita longwa na Likoló, epai na Nzambe, ebongisami lokola mwasi na libala oyo amilengeli mpo na mobali na ye." Yango wana mpenza.

<sup>859</sup> Kuna alobaki: “Mwasi... Mwana-mpate ná Mwasi-na-libala bakozala kuna libela.” Mabelé ya sika ekozala, ya ba-kilometre carré milió na milió. Oh, la la! Engumba yango, Biblia elobelí monene ya Engumba yango, ekozala carré ya ba-kilometre nkótó ntuku mibale na nkama minei. Ezali na bolai ya ba-kilometre nkótó ntuku mibale na nkama minei, na bonene ya ba-kilometre nkótó ntuku mibale na nkama minei, mpe na bosanda ya likoló ya ba-kilometre nkótó ntuku mibale na nkama minei. Yango mpenza nde oyo Biblia etalisi ete Engumba yango ekozala. Kokamwa te ete mbu ekozala lisusu te, esika mpo na yango ezalaki te.

<sup>860</sup> Oh, ekozala mpenza kitoko mingi! Mpe na kati kuna, ezali na liziba moko mpenza na Ngwende ya Nzambe, ezali kotiólá liboso na Ngwende. Nzete moko ezali na ngámbo nyonso mibale ya nzete... ya ebale ya Bomoi. Mpe nzete yango ezali na mbuma ya lolenge zomi na mibale, ebótaka mbuma na yango sánza na sánza.

<sup>861</sup> Bampaka ntuku mibale na minei bazali kuna. Mwasi-na-libala azali kuna. Bankótó mokama na ntuku minei na minei bazali kuna, mikube ya tempelo. Oh, ndeko, tozali kokende na esika moko! Makambo ezali liboso na biso. Minei... Bampaka ntuku mibale na minei. Mikube nkótó mokama na ntuku minei na minei. Mwasi-na-libala afandi elongo ná Klisto. Oh la la, okoloba... Ndako na ngai, Ndako kitoko! Amen.

<sup>862</sup> Kokanisa ete nazali na litomba ya kokende kuna, bino mpe bozali na litomba ya kokende kuna. Bongo mpo na nini okopona kotambola kati na molili oyo, mpe kozanga komona Pole, ná kokufa, ná kokota na libebi mpe kokómá eloko moko te? Mpamba te, ntango Pole ezui bokonzi na yango nyonso, esika ya molili ezali lisusu te. Kende koluka esika molili ekendeki ntango pole eyaki. Ekozala bongo, ntango makambo nyonso ekozonga epai na Nzambe. Ezalaki na, molili ezalaki na ebandeli, molili ezali na nsuka. Pole etikálá kozala na ebandeli te, ekotikala mpe kozala na nsuka ata moke te. Nzambe atikálá kozala na ebandeli te, to mpe kozala na nsuka ata moke te. Boye, mokolo moko, mokili mobimba oyo ebébá ná lisumu na yango nyonso mpe kitoko na yango, ya maloba, ná mabanzo na yango nyonso mpe loyenge na yango, ná kongenga na yango nyonso mpe nyonso ekosila mpe ekokómá eloko mpamba, mpe ekozala lisusu te. Ekozala lisusu te, ekozala lisusu na makanisi te! Elobami ata ete: “Ekozonga lisusu na makanisi te.”

<sup>863</sup> Kasi bapámbolami ya Nkolo bakozala ntango nyonso elongo na Ye. Tokozala na nzoto lokola nzoto na Ye Moko ya nkembo; mpe tokobika elongo ná Ye, mpe tokolia elongo ná Ye, mpe tokofanda elongo ná Ye, mpe tokoumela elongo ná Ye libela na libela, mpe na bantango oyo ekoki kotangama te; mpe bileko ya Seko ekokóbá na mokili oyo ezangi nsuka.

<sup>864</sup> Mpe osengeli kopona na mpokwa oyo. Soki omilengeli te mpo na kokende na esika yango, ata okendeke na losambo boni boni, ata ozalaka mondimi ya malamu ndenge nini, osili kobunga, soki Klisto apesi yo naino te Bomoi ya sika, na kati ya molili oyo ozali kotambola na yango. Okoki kozala mosambeli. Basambeli, býoka, baninga, eyamba ezali likambo ya mayele ya bongó. Bomoni? Bana nyonso ya Kaina bazalaka ntango nyonso na eyamba. Bayuda wana bazalaki na eyamba ntango Yesu ayaki, kasi baboyaki lobiko.

<sup>865</sup> Okoki kozala mosambeli mpenza na mpokwa oyo. Okoki kozala Presbyterien, Metodiste, Pantekotiste, Nazaréen, Pèlerin de la sainteté. Okoki mpenza kozala mosambeli; okendeke na losambo na bino mpe otatolaka, okoki koyemba, kogánga mpe kosanzola Nkolo, okoki komema moko na zomi na yo na losambo, okoki kosalela mozalani na yo bolamu, oyo wana etali ata moke te esika okolekissa Seko-na-seko na yo. Kaina asalaki nyonso wana. Na ntembe te.

<sup>866</sup> Biblia elobi ete “blé ná matiti mabe ekólaka elongo”. Mwa molóná ya blé ezalaka wana, ezali na mposa makasi ya mbula, ná ba—banzúbe mpe lokola. Ntango mbula eyei, banzúbe mpe esepelaka kozua mbula, ndenge moko lokola blé. “Kasi, na mbuma na bango, nde bokoyeba bango.”

Sikawa tóbondela, wana ozali kotála-tala bambuma na yo.

<sup>867</sup> Sikawa, Tata Nzambe, ezalaki na mituna mosusu ya káfukafu awa na mpokwa oyo. Ntango mosusu nasalaki likambo esengelaki te, kasi nasali yango na boyebi na ngai nyonso; Oyebi motema na ngai. Nabondeli, e Nzambe, ete Óyamba yango. Sikawa, ntango mosusu, kati na mwa mituna oyo, soki nayanolaki yango ndenge esengeli te, na bongo Yo lobá na mitema ya bato, mpe sémbola yango ndenge esengelaki kozala. Nazali komiyoka lokola Yo nde osolólaki na ngai. Kasi soki nakokaki kozala na libunga, na bongo Yo limbisa ngai.

<sup>868</sup> Mpe nabondeli, e Nzambe, ete moko na moko na bango ázua makambo oyo na motema na ye, mpe tika ete bámanyola yango mpe bákánisa boye: “Iyo, lingomba yango oyo, tálá makambo oyo. Yango nde oyo Biblia elobaki.”

<sup>869</sup> Ntango mosusu basi, Nkolo, Oyebi ete nakánaki moto moko te, ntango nayebisaki bango makambo yango. Kasi, e Nzambe, na—nalingaka bandeko na ngai ya basi, mpe Oyebi yango, Tata. Oyebi ndenge nakanisaka mpo na bango. Kasi kotelema mpo náyebisa bango eloko moko ya lokuta, nakozala mo—mopengwisi mpo na bango. Naboyi kozala mopengwisi mpo na bandeko na ngai ya basi, nalingi koyebisa bango Solo. Mpe, Tata, nazui Yango mpenza na Liloba na Yo.

<sup>870</sup> Sikawa nakweisi bandeko na ngai ya mibali te, kasi, Nkolo, nalobi ete bazalaka na libunga, ntango bapesaka nzela na makambo yango. Mpe soki mwasi yango ayebaki ndenge mosusu

mpe akobaki na ye kosala yango, na bongo ezali likambo na ye, mokengeli akweisami te.

<sup>871</sup> Abba Tata, makambo yango ezali Liloba na Yo, mpe ezali ya Yo. Sikawa, Yo lobá na mitema ya bato. Natiki bango nyonsona maboko na Yo. Nakomona oyo Osili kosala, Tata; Oyebi. Loba ná motema moko na moko. Tosengi na Nkombo na Klisto.

Mpe wana togumbi mitó:

<sup>872</sup> Nazali komituna soki moto moko akolinga kotombola loboko, koloba: "Ndeko Branham, kanisa ngai mpo nákoka kozala molóngi na mobimba, mpe, na mokolo ya nsuka, nálata elamba ya libala mpe názala elongo na Klisto." Okolina kotómbola loboko, koloba: "Bóndela mpo na ngai"?

<sup>873</sup> Bino nyonso bóboka kokitisa mitó sikawa, kogumba mitó. Nzambe ápambola bino, ezali malamu. Kuna, Nzambe ápambola bino, bandeko na ngai ya basi; ná bandeko na ngai ya mibali mpe, baoyo botómboli maboko. Ezali kitoko mingi.

<sup>874</sup> Sikawa, Tata, Omoni maboko na bango. (Nayebi, ntango mosusu bokanisaka: "Ee, kaka mwa libondeli ya ndenge wana?") E Nzambe, nakanisi mama wana, oyo, lobi, alobaki: "Kaka mwa libondeli moko kuna na ndako na ye, mokolo wana, ntango mwana mobali wana azalaki kobunda na liwa, oyo atikáláki na mpósó misato ya kozala na bomoi, ná litutu monene mabe wana na bongó, mpe sikawa, yango nde ebongolaki makambo."

<sup>875</sup> Nakanisi Ezekiya, oyo abalolaki elongi na ye na etutú, mpe alelaki: "Nkolo, nabondeli Yo, yokela ngai mawa. Kanisa ngai, mpo natámbolaki liboso na Yo na motema oyo ebongi be." Ebóngolaki kufa na bomoi.

<sup>876</sup> Mwana na Nzambe agángaki bobele mbala moko: "Lazálo, bima!" mpe mokufi abimaki.

<sup>877</sup> E Nzambe, Olobáki: "Bóloba, bósenga, mpe ekopesamelia bino. Soki olobi likambo, ndima ete oyo olobi ekokokisama, okozua oyo olobi."

<sup>878</sup> Sikawa, Tata, nabondeli ete moto nyonso oyo atómbolaki loboko ázua eloko oyo atombolaki loboko mpo na yango. Mpe tika ete bápambolama. Mpe, e Nzambe, nabondeli ete Osunga bandeko na biso ya basi, mpo bázala... tika ete bámikamba malamu, wana Satana, na nzela ya television ná ba-zulunále ya *Lisolo Ya Solo* mpe bongo na bongo, oyo basaleli kozanga eyongi, ná ba-émission oyo balongolaka biteni ya mabe te, makambo ya bosoto ná nsoni na television mpe bongo na bongo, oyo... Ekokaki kozala esalelo mpo na komema bato milió na milió epai na Yo, kasi lokola balongolaka biteni na yango ya mabe te, mpe balakisaka makambo nyonso wana ya bosoto, oyo bango... Oh, mawa mingi! Mpe koyeba ete molimo ya zabolo esili kokóta kati na bandeko na biso ya basi mpe zingazinga na bango, mpe ezali

koluka kotinda bango bálanda makambo ya mikolo oyo ya mode mpe koláta bongo.

<sup>879</sup> Mpe tomoni ete kati na . . . kati na bandeko na biso ya mibali mpe, Nkolo, bakanisaka ete bakoki komela makaya mpe komela masanga, mpe kosala makambo ya ndenge wana, kasi bazali kaka Baklisto mpo balobaka ete “bandimaka”. Sálá ete báyeba ete “zabolo mpe andimaka.” Kasi abikisami te, “andimaka mpe alengaka.”

<sup>880</sup> Sikawa, Tata, tobondeli ete Óyókela biso nyonso mawa, mpe Ólimbisa biso masumu na biso, mpe ntango mosusu bato mosusu batómbolaki maboko te, E Nzambe, yokela bango mawa. Tika ete na libakú oyo bakozua nsima, bátombola maboko na bango.

<sup>881</sup> Tobélemi mpo na kolia elámbo, Nkolo. Limbisa biso mabe na biso ná mabunga oyo tosalaki na bomoi na biso. Mpe tika ete tóyamba lipamboli na Yo, mpo tosengi yango na Nkombo na Klisto. Amen.

<sup>882</sup> Nkolo ápambola bino. Bólimbisa ngai ndenge naumisi bino boye. Nazali komituna, liboso na elambo, soki moto moko azali, oyo ayaki mpo tóbondela mpo na ye, oyo alingi ete tóbondela mpo na ye, ee, tokosepela kosala yango na ngonga oyo, soki moto moko azali, oyo alingi ete tóbondela mpo na ye.

<sup>883</sup> Malamu, ndeko, yaka na ye mbala moko, ezali mabe te. Bózela naino, na nsima, toko—tokosilisa liyangani. Na nsima, ntango tokosilisa liyangani, na bongo baoyo balingi kotikala mpo na elambo, bakoki kotikala. Kasi sikawa tokobondela mpo na babeli. Biblia elobaki nini?

<sup>884</sup> Soki ndeko yango akoki kotelema te . . . Ezali likambo te, bótika ye áfanda wana, biso tokoyá epai na ye. Ezali likambo te, bótika ye áfanda wana. Biso tokokita mpo na kobóndela mpo na ye. Ezali mabe te. Malamu, misie, bótika—bótika ye áfanda kaka wana. Ezali mpasi mpo na ye kotelema awa, ee, tokosepela koya epai na ye.

<sup>885</sup> Sikawa nalingi koloba likambo moko ya moke oyo, moninga na ngai molingami. Bomoni, na—nayebi ete Nkolo asili kotálisá yango polele mbala na mbala, mbala mingi. Bomoni? Ngai nazali mpenza motei monene te, natángá te mpe nyonso wana. Nalingaka Nkolo Yesu, Nzambe ayebi ete nalingaka Ye. Kasi nabéngámáki mpo na kosala mosala moko, kobondela mpo na babeli. Ondimi yango? Ata liboso náyéba mpenza likabo yango, nazaláká kokende kuna na lopitalo; mpe nazali koyeba lisusu ndenge ba-infirmière wana bazalaki koloba: “Sikawa, okoyóka malamu.” Bomoni? Mpe ezalaka bobele eloko moko, oyo Nzambe, oyo atondi na ngolu, akokisaka mabondeli na ngai mpo na bato.

<sup>886</sup> Nakanisi, na mpokwa oyo, ete soki babengisi bato, ekozala lokito monene na mokili mobimba, na bisika nyonso na mokili mobimba. Soki balobi ete bato nyonso oyo Ndeko Branham asilá kobondela mpo na bango, báya awa, nakolina ete bóyanola na

gouvernement ya États-Unis, na mikanda. Mpe Nsango yango ekopanzana na mokili mobimba. Nabanzi, ntango mosusu bato milió minei to mitano bakoyanola na mbela yango, soki bayebisi yango na bato. Bomoni?

<sup>887</sup> Mpe bato yango, to bamosusu na bango basílaki kokufa, monganga asilaki komona ete bakufi, ná—ná mobongisi bibembe. Bamosusu na bango basilaki kobomama na makamá ya motuka; bamosusu na bango bakúfaki na liwa ya bato nyonso. Bamosusu na bango bazalaki bakufi miso, baténgumi, bibósono, bato na bukabuka, bato na mawa, ná maláli ya bongó...na balopitalo, bayebaki ata te ete biso tozalaki na lopitalo mpo na kobondela mpo na bango. Bazalaki komema bango, basengelaki komema bango. Bazalaki kobunda-bunda mpe komikata-kata, kozanga ata koyeba esika bazali. Na miniti mitano, bazóngi malamu, na bopolو, bato na bolingo, mpe na makanisi malamu na mikolo na bango oyo etikali. Bomoni?

<sup>888</sup> Ezali...Ezali nini? Ezali Ndeko Branham te. Ezali Yesu Klisto, Ye nde atindaki ngai mpo nábondelaka mpo na babeli. Sikawa, likambo ezali boye. Ezalaka na elóniga mingi te na Jeffersonville, mpo, ntina yango oyo. Sikawa, nalingi bóyeba ete nazalaka na baninga na ngai mosusu ya pembeni mpenza ná ya malamu mpenza, oyo bazalaka awa na engumba oyo. Atako engumba yango moko, lolenge engumba yango ezalaka, nalingaka yango te. Nalingaka lolenge oyo te, mpe natikálá kolingá yango te; ntango nazalaki mwana moke, nazalaki kofanda, kotángá babúku na ngai ya histoire, nazalaki koloba: "Mokolo moko nakolongwa awa." Bomoni?

<sup>889</sup> Nalingaka Jeffersonville te, ezali mai-mai, ezali na nsé, awa. Mabele na yango ezalaka mpenza mai-mai, mpe—mpe ezalaka mpenza mabe. Matá awa na likoló ya Spickert Knobs to na esika moko boye, mpe kitisa miso na ngámbo ya New Albany ná Jeffersonville, soki bolungi komona. Bótala awa, minganga bazali kutu koloba sikawa, ete: "Bato ya lobwaku oyo bakomi kosila makila mpo na lolenge yango."

<sup>890</sup> Mama moke moko awa, Mme Morgan, oyo abikaki na cancer, amemaki mbwa na ye awa na lopitalo, akanisaki ete ezalaki na makwanza. Boyebi eloko nini yango ezalaki? Ba-salíté ya kompani Colgate ná nyonso wana oyo ezalaki likoló ya matiti, esika elekaki. Ezali esika oyo eleki na bosoto.

<sup>891</sup> Elenge mobali moko azalaki na Mampinga, ayaki awa mpeazuaki...Azalaki na bokono ya mpéma. Akendeki na Floride mpe miso na ye eyíndaki mingi, akendeki epai ya monganga, mpe alobaki: "Monganga..."

<sup>892</sup> Monganga alobaki: "Sikawa, outi kobunda, boye te?"

<sup>893</sup> Alobaki: "Te, misie, nabundi te."

<sup>894</sup> Soki bolingi koyeba nani ye azali, nkombo na ye Herby. Sikawa, soki nakoki kaka kakanisa... Ezali—ezali na Union National Bank, na New Albany, azalaka caissier. Bókende kaka kuna, bóluka moto oyo nkombo na ye “Herby,” bótuna ye.

<sup>895</sup> Mpe alobaki... Akendeki, alobaki: “Monganga,” alobaki, “nazali na bokono ya sinusite.”

<sup>896</sup> Mpe atálaki nzoto na ye malamu, alobaki: “Ya solo.” Alobaki: “Nakanisaki ete outaki kobunda.” Alobaki: “Mwana, ofandaka wapi?”

<sup>897</sup> Alobaki: “Ntango mosusu oyebi esika yango te,” alobaki, “nafándaka na engumba moko ya moke, pemberi na Louisville, na Kentucky, nkombo na yango New Albany, na Indiana.”

<sup>898</sup> Alobaki: “Olingi koyebisa ngai ete ozui bokono ya sinusite na mai ya mungwa, awa na Miami, ntango ozalaki koya awa?” Alobaki: “Soki okoki kofanda na Jeffersonville, na Indiana, to na New Albany, na Indiana, okoki kofanda na bisika nyonso na mokili mobimba, epai mapinga ya États-Unis ekotinda yo.” Esili. Bomoni?

<sup>899</sup> Ezali esika ya bosoto koleka na mokili mobimba, na boyebi na ngai, longola bobele bisika ya mai-mai oyo ezalaka na malaria. Bomoni? Mpe na—na—na—nazali na baninga awa.

<sup>900</sup> Bótala awa, nakoki mpenza kotánga bankombo na bango ndenge wana. Bótala Dr. Sam Adair, moninga na ngai. Malamu, Mike Egan ye wana, afandi kuna. Oh la la, nakoki kotánga nkombo ebele! Bankama na nkama ya baninga malamu, ya solosolo, baninga na ngai ya kala, oyo nazalaka na bango... Ata nakómí na baninga ya sika boni, eloko moko te ekozua esika ya moninga ya kala. Boyebi yango.

<sup>901</sup> Mobange ya mama na ngai oyo afandi kuna na nsuka, atikali lisusu na mikolo mingi te na mokili, asílá koleka mibu ntuku motoba. Mama ya mwasi na ngai ye wana, azali na mibu ntuku nsambo, alingi kokokisa mibu ntuku nsambo na moko; afandi awa na esika moko boye, nakanisi, na mpokwa oyo. Bongo, kotika ye. Papa na ngai akundámá awa; mwasi na ngai akundámá awa na Walnut Ridge; bebé na ngai alali kuna. Bomoni nini nalingaka koloba?

<sup>902</sup> Na—na—nalingaka te...na—na—na—nalingaka kofanda awa te, mpe nakanisi ete kala mingi te, noki-noki, nakosengela kolongwa. Bomoni, mpo ezali koyela ngai ntango nyonso, nazali koloba yango na eteyelo mpe liboso na Biblia na ngai.

<sup>903</sup> Ntango nayebisaki mwasi na ngai, ntango bapesaki biso mbongo mpo tótonga ndako ya mokengeli, oyo napesaki na losambo oyo... Losambo oyo nde nkolo-ndako ya mokengeli yango; bókende kuna, bokomona soki ezali bongo te. Bomoni, naboyaki kozua yango ngai moko.

<sup>904</sup> Sikawa, ntango nalingaki kotonga kuna, Meda alobaki: “Nalingi kotikala awa mpo na mama na ngai.”

<sup>905</sup> Nalobaki: “Molingami, na ntembe te, tokokanisa yango. Omoni, ekosimba mpenza te. Nzambe alobaki: ‘Kabwáná na bango,’ nasengeli kosala yango.”

<sup>906</sup> Mpe alobaki: “Ee, mama na ngai!”

<sup>907</sup> Nalobaki: “Mama na ngai mpe lokola. ‘Kasi ye oyo akosundola baoyo ya ye moko te, mpo na kolanda Ngai, alongobani te kobengama oyo ya Ngai.’ Ezali ya solo.”

<sup>908</sup> Mokolo moko, kala mingi te, nazomona ete nakosengela kolongwa, elingi koloba, kokende mosika. Kasi ntina yango oyo, awa, mayangani ekosimba mpenza te. Ekosimba te, ndenge esimbaka bisika mosusu, mpe moto nyonso oyo asilá kozala na mayangani ayebi ete ezali solo, Mpo awa ezali engumba na ngai mpenza. Ezalaka bongo.

<sup>909</sup> Yesu alobaki ndenge moko, ntango Ayaki.

<sup>910</sup> Balobaki: “Moto oyo azali nani? Azali mwana ya mosalimabaya ya awa te? Atángá mpenza na eteyelo nini? Mayele oyo azuaki yango wapi? Sikawa tika ete námona yo kosala... Olobaki ete osalaki bikamwa esika moko, tika ete námona yo kosala ndenge moko awa. Oyo osalaki na Kapernaume, tika ete námona yo kosala yango awa.”

<sup>911</sup> Yesu alobaki... “Akamwaki na kozanga kondima na bango.” Abalukaki mpe alobaki: “Solo, solo, Nalobi na bino, mosakoli azángaka lokumu te bobele soki azali epai ya bato na ye moko, na ekólo na ye moko.” Boye te?

<sup>912</sup> Mpe toyebi...bótala...Bózua Finney, bótua Sankey, Moody; bótua John Wesley, akokaki koyébana ata moke te, bomoni, liboso álongwa na ekólo na ye. Bótala—bótala—bótala Moody. Ntango Moody, mobongisi sapato ya Boston, akokaki koyebana ata moke te, ayaki na Chicago, liboso ákoka koyebana. Bomoni? Asengelaki kozua yango mosika na baoyo ya ye moko. Ekosengela na yo ntango nyonso kosala bongo.

<sup>913</sup> Kasi sikawa, awa, Nzambe akoyanola na libondeli soki bobósani ete ezali William Branham (Bomoni?), soki bobosani ete ezali William Branham, ete azali na eloko moko te ya kosala ná likambo yango, kaka moko oyo azali wana mpo na kobóndela mpo na bino. Yesu Klisto nde asilá kosala oyo bouti kosenga, soki bokoki kaka kondima yango. Bomoni? Yango etalaka te... Nazali na eloko ata moko te ya kosala, bobele kotatola. Kasi emonanaka lokola, nsima na ngai kokólá awa elongo na bino, boyebi bolembu na ngai nyonso, mpe mabe na ngai nyonso... Mpe boyebi oyo Nzambe asilá kosala, mpenza na engumba oyo.

<sup>914</sup> Engumba oyo, na Mokolo ya Kosámbisama, ekosamba na makambo mingi koleka mokolo moko, mpo bato nkama na nkama basilá kobika na bokono ya mpasi mingi kaka awa

(Ya solo.), kaka awa. Bilembo ná bikamwa, mpe komonana ya Mwanje kuna, mpe ba-zulunale epanzáki mpenza nsango na yango ná makambo nyonso wana, kasi ata bongo bato... Ezali mpo na nini?

<sup>915</sup> Sikawa mokolo moko, nakolongwa awa. Nazomituna: "Nsuka na ngai ekozala nini? Ekómi nde na nsuka? Etikali nde moke? Nakómi na mibu ntuku minei na mwambe. Ekómi nde pene na nsuka?" Namitunaka bongo. Soki ekómi...

<sup>916</sup> Bótala, mpo na nini mokili esósolaki fotó wana te? Mpo na nini basósolaki yango noki-noki te? Mpo na nini basósoli makambo mosusu oyo te? Mpo na nini basósoli te masakoli oyo ná makambo oyo? Boyebi, bakoki kosala yango sikawa te, kasi mokolo moko nakolongwa na mokili, mpe ntango nakolongwa, bongo nde bakoyeba Yango. Bamosusu kati na bino bilenge bokosósola yango nsima na ngai kokende. Bomoní? Kasi Nzambe akopesa nzela te ete ésalema sikawa. Bomoní oyo... bosósoli eloko nini nalingi koloba. [Maloba mazangi na bande—Mok.]

<sup>917</sup> ...kaka mwa bracelet ya mwana mwasi. Soki moto moko akoki koya kozua yango. Mpe nabanzi ete Ndeko Sothmann alobaki ete atikaki Biblia moko awa, mbala ya nsuka oyo azalaki awa, nabanzi. Moto moko amonaki Biblia moko, bi—Biblia moko, oyo babosanaki awa? Soki bomoni yango, ezali ya Ndeko Fred Sothmann ya Canada. Sikawa tóbondela.

<sup>918</sup> Nkolo, yókela biso mawa, wana mizíki ezobéta na bopolo mpe Ndeko Neville asengeli kopakola bato mafuta, Nakokende kotiela babeli maboko na Nkombo na Yesu. Kokisa yango, Nkolo, mpo na lobiko ya nzoto na bango. Amen.

<sup>919</sup> Bato nyonso bábondela, sikawa, bato nyonso. Malamu.

Nkolo, mwana yango, nkóko na ye ya mobali atelemi awa mpo na ye. Nzoto na ye eboyaka miliki, miliki nyonso. Kasi Yo ozali na Nguya nyonso mpe mwana mobali yango akoki kozala na kondima mpo na ye moko te. Na bongo, Nkolo, nazali na kondima mpo na ye, elongo ná baboti mpe ba-nkóko na ye, mpe tolobi, na Nkombo na Yesu, ete bebé yango ákoka komela miliki mpe ázala na bomoi mpo na nkembo ya Nzambe. Amen. Ekosalema bongo.

Oh, Nzambe, mwasi oyo azali kobondela mpo na tata na ye. Nabondeli elongo na ye ete Óbikisa tata na ye mpe Ópesa ye oyo asengeli na yango, na Nkombo na Klisto. Amen.

<sup>920</sup> Sikawa, ezali pete, boye te? Bato bazali kobondela, kasi yango nde eloko oyo bato... Bazelaka komona makambo ya minene mpe babúlunganisaka yango. Nzambe asalaka ete ézala pete. Bino bobúlunganisaka yango mpe bozángaka yango. Bomoní? Bokómisaka... Bótika ézala pete ndenge Nzambe alobaki: "Bilembo oyo ekolanda baoyo bakondima; soki batieri babeli maboko, bakobika," ndenge Nzambe alobaki.

<sup>921</sup> Totieli mwasi oyo maboko, Nkolo, ndeko na biso ya mwasi oyo atelemi awa, mpe tika ete ábika ndenge tosengi yango, na Nkombo na Yesu Klisto. Amen.

<sup>922</sup> Tata, wana totieli ndeko na biso ya mwasi maboko, na Nkombo na Yesu Klisto, mpo na kokundola Biblia ná malakisi ya Nkolo, tika ete ábika.

Tata, na Nkombo na Klisto, tosengi lobiko ya nzoto ya ndeko na biso ya mwasi, mpe nabondeli ete Ópesa ye nzoto kolongono, wana totísi Liloba na Yo, ata ntembe moke ezali te na makanisi na ngai ete akoki. . . ? . . Amen.

<sup>923</sup> Tata, totieli ndeko na biso ya mwasi maboko, mpe tosengi, na Nkombo na Nkolo Yesu, ete Óbikisa ye mpe Ópesa ye nzoto kolongono. Amen.

Na Nkombo na Nkolo Yesu, totieli ndeko na biso maboko mpe tosengi ete Óbikisa ye mpo na nkembo ya Nzambe.

Tata, na Nkombo na Nkolo Yesu, topakoli ndeko mwasi mafuta, totieli ye maboko mpe tosengi lobiko na ye na Nkombo na Yesu.

Tata Nzambe, totieli ndeko na biso maboko, tosengi yango, na Nkombo na Yesu Klisto, wana topakoli ye mafuta, ete Óbikisa ye.

Tata, awa, mwasi na ye molingami. . . ? . . topakoli ye mafuta mpe totieli ye maboko, tosengi yango, na Nkombo na Yesu Klisto.

<sup>924</sup> Nkolo Nzambe, topakoli elenge Edith mafuta, totieli ye maboko, mpe tosengi na Nkombo na Nkolo Yesu Klisto ete Ókokisa bosenga na ye.

Tata, topakoli mpe na mama na ye mafuta, totieli ye maboko mpe tosengi lobiko na ye, na Nkombo na Nkolo Yesu Klisto, tika ete ábika.

<sup>925</sup> Tata, topakoli mwana moke oyo mafuta, azali paúni mpo na libota oyo, azali na motuya mingi, na Nkombo na Nkolo Yesu, mokolo moko, topesaki ye na maboko na Ye, mpe nabondeli ete Óbikisa ye. . . ? . .

<sup>926</sup> E Nzambe, Oyebi bosenga ya ndeko na biso ya mwasi mpe totóndi Yo mpo na kondima na ye ya mpiko. Sikawa, tika ete makambo oyo asengaki, oyo. . . ? . . oyo azalaki kosakana na yango ntango azalaki mwana moke, e Nzambe, tika ete mongúna átika mwasi yango, mpe tika ete ázonga na ndako na nzoto kolongono, Nkolo. Tobondeli mpe mpo na mobali wana, oyo asengaki mpo na ye, Olakaki ete: "Soki bosengi eloko moko na Nkombo na Ngai, Nakosala yango." Nabondeli ete Ókokisa bosenga oyo, na Nkombo na Yesu. Amen. Nzambe ápambola yo.

<sup>927</sup> Nkolo, wana mosisa oyo ebandi kokufa na elongi ya ndeko na ngai, tosengi ete bomoi ézonga, wana totieli ye maboko mpe tosengi yango, na Nkombo na Yesu, ete mosisa yango ébika.

Tata Nzambe, totieli ndeko na biso ya mwasi maboko, nsima na biso kopakola ye mafuta, na Nkombo na Nkolo Yesu Klisto, tosengi lobiko na ye. Amen.

<sup>928</sup> Tata na biso na Likoló, wana ndeko na biso ya mwasi atelemi awa mpo na makambo mingi ya minene oyo Osilá kopesa ye elonga na yango, atelemi awa mpo na mosali na Yo moko, motei, oyo azali na motema likoló mpenza; motema na biso etondi na mawa mpo na ye, toyebi oyo azali koleka kati na yango. Nabondeli, e Nzambe, ete Ópakola ndeko na biso ya mwasi oyo atelemi awa mpo na ye, pakola ye mpo ávikisama na bokono na ye. Nabondeli, na Nkombo na Klisto. Amen....?....Nkolo ayebi...?....

<sup>929</sup> Malamu. Nasepeli mingi. Ezali mpenza epakweli ya Nkolo. Nkolo Nzambe, nsima na mwasi oyo kokangolama na molimo mabe oyo abundisaki mibu ebele, mokolo moko Omemaki ye kuna na ndako, na nsima Molimo ekitaki: "YANGO ELOBI NKOLO," nsima na ye kolela, kotandama na etumbelo, kosala nyonso oyo akokaki kosala, kasi esengelaki na YANGO ELOBI NKOLO. Sikawa, ayei mpo na bebé ya ndeko na ye ya mwasi oyo azali kosánza; atamboli naino te, ata asilí kolekisa mobu moko. Nabondeli, Nkolo, ete Ópesa ye mapamboli ya Nzambe na Nkombo na Yesu Klisto. Nasepeli mingi mpo na yango, ndeko mwasi, okómi mpe ndenge mosusu. Mpe okokufa mpenza sikoyo te, boye?

Tata Nzambe, tobóndeli ete Ópambola ndeko na biso ya mwasi wana topakoli ye mafuta mpe totieli ye maboko, mpe nasengi ete likambo oyo Olobaki, ete: "Bilembo oyo ekobila baoyo bakondima. Bakotiela babeli maboko, bakobika." Toyamboli ete tozali bandimi, Nkolo, boye, tobondeli ete Ósala likambo moko, na Nkombo na Yesu....?....

<sup>930</sup> Tata Nzambe, lokola toyebi motema ya elenge mwasi oyo, ndenge auti kobimisa nyonso, tobóndeli ete Óyokela ye mawa mpe Ókokisa makambo oyo asili kosenga. E Tata Nzambe, mpo na libota na ye, mpo na bana na ye, koleka mingi mpo na mwana na ye ya mobali, E Nzambe, nabondeli sikawa ete Ókokisa makambo yango....?....na motema na ngai mobimba, nasengi yango, na Nkombo na Yesu. Amen.

Tata Nzambe, wana topakoli mwasi oyo mafuta, mpe tobondeli mpo na ye na Nkombo na Nkolo Yesu, ete Óvikisa ye mpe Ópesa ye nzoto kolongono mpo na nkembo na Nzambe.

<sup>931</sup> Nkombo na yo ekoki kozala West, boye te?

Tata, tobondeli mpo na mama moke oyo. Asengi yango mpo na papa na ye. Sikawa, nabondeli ete Ópesa yango na papa na ye, solólá na motema na ye, Nkolo. Alingi ete papa na ye ávikisama. Alingi te ete ázala na mokili, ndenge azali, ye oyo azali mwana na ye mpenza, mokitani na ye. Nabondeli, Tata, ete Óyokela ye mawa, na Nkombo na Klisto.

<sup>932</sup> Ópambolama, mwana na ngai ya mwasi, tika ete Nzambe ápesa yo oyo osengi.

Nzambe Molingami, tosengi mawa mpo na elenge mwasi oyo, mpe tosengi ete Óyokela ye mawa, wana topakoli ye mafuta . . . ? . . . 

57-1006 Mituna Mpe Biyano Baebele Eteni Ya III  
Branham Tabernacle  
Jeffersonville, Indiana U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyikanisama te, kotiama na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)